

# 宋詞三百首

宴山亭·北行

見杏花（趙

佶） 裁翦冰綃，

輕疊數重，淡

著燕脂勻注。

新樣靚妝，艷  
溢香融，羞殺  
蕊珠宮女。易  
得凋零，更多  
少、無情風雨。  
愁苦。問院落  
淒涼，幾番春

暮？ 憑寄

離恨重重，者

雙燕何曾，會

人言語？天遙

地遠，萬水千

山，知他故宮

何處？怎不思

量？除夢裏、  
有時曾去。無  
據。和夢也、  
新來不做。

木蘭花（錢惟  
演） 城上風光  
鶯語亂。城下

煙波春拍岸。

綠楊芳草幾時

休？淚眼愁腸

先已斷。

情懷漸覺成衰

晚。鸞鏡朱顏

驚暗換。昔年

多病厭芳尊，  
今日芳尊惟恐  
淺。

蘇幕遮（范仲淹）  
碧雲天，  
黃葉地，秋色  
連波，波上寒

煙翠。山映斜  
陽天接水，芳  
草無情，更在  
斜陽外。

黯鄉魂，追旅  
思，夜夜除非，  
好夢留人睡。

明月樓高休獨  
倚，酒入愁腸，  
化作相思淚。

御街行（范仲  
淹） 紛紛墮葉  
飄香砌，夜寂  
靜，寒聲碎。



真珠簾卷玉樓  
空，天淡銀河  
垂地。年年今  
夜，月華如練，  
長是人千里。  
愁腸已斷無由  
醉，酒未到，

先成淚。殘燈  
明滅枕頭欹，  
諳盡孤眠滋味。  
都來此事，眉  
間心上，無計  
相迴避。

千秋歲（張  
先） 數聲鶯畎，  
又報芳菲歇。  
惜春更選殘紅  
折，雨輕風色  
暴，梅子青時  
節。永豐柳，

無人盡日花飛  
雪。

莫把麼弦撥，  
怨極弦能說。

天不老，情難  
絕，心似雙絲  
網，中有千千

結。夜過也，  
東窗未白孤燈  
滅。

菩薩蠻（張  
先） 哀箏一弄

《湘江曲》，

聲聲寫盡湘波

綠。纖指十三  
弦，細將幽恨  
傳。當筵秋水  
慢，玉柱斜飛  
雁。彈到斷腸  
時，春山眉黛  
低。

醉垂鞭（張  
先） 雙蝶繡羅  
裙，東池宴初  
相見。朱粉不  
深勻，閑花淡  
淡春。細看諸  
處好，人人道

柳腰身。昨日  
亂山昏，來時  
衣上雲。

一叢花（張  
先） 傷高懷遠  
幾時窮？無物  
似情濃。離愁



正引千絲亂，  
更東陌、飛絮  
濛濛。嘶騎漸  
遙，征塵不斷，  
何處認郎蹤？  
雙鴛池沼水溶  
溶，南北小橈

通。 梯橫畫閣  
黃昏後，又還  
是、斜月簾櫳。

沉恨細思，不  
如桃杏，猶解  
嫁東風。

天仙子（張  
先）（時爲嘉  
禾小倅，以病  
眠，不赴府  
會）

《水調》數聲  
持酒聽，午醉

醒來愁未醒。  
送春春去幾時  
回？臨晚鏡，  
傷流景，往事  
後期空記省。  
沙上並禽池上  
暝，雲破月來

花弄影。重重  
簾幕密遮燈，  
風不定，人初  
靜，明日落紅  
應滿徑。

青門引（張  
先） 乍暖還輕

冷，風雨晚來  
方定。庭軒寂  
寞近清明，殘  
花中酒，又是  
去年病。

樓頭畫角風吹  
醒，入夜重門

靜。 那堪更被  
明月，隔牆送  
過鞦韆影。

浣溪沙（晏  
殊） 一曲新詞  
酒一杯，去年  
天氣舊池臺，

夕陽西下幾時  
回？無可奈何  
花落去，似曾  
相識燕歸來，  
小園香徑獨徘  
徊。



浣溪沙（晏殊）  
一向年光有限身，等閒  
離別易消魂，  
酒筵歌席莫辭  
頻。滿目山河  
空念遠，落花

風雨更傷春，  
不如憐取眼前  
人。

清平樂（晏  
殊） 紅箋小字，  
說盡平生意，  
鴻雁在雲魚在

水，惆悵此情  
難寄。

斜陽獨倚西樓，  
遙山恰對簾鉤。

人面不知何處，  
綠波依舊東流。

清平樂（晏  
殊） 金風細細，  
葉葉梧桐墜。  
綠酒初嘗人易  
醉，一枕小窗  
濃睡。

紫薇朱槿花殘，  
斜陽却照闌干。

雙燕欲歸時節，  
銀屏昨夜微寒。

木蘭花（晏  
殊） 燕鴻過後  
鶯歸去，細算

浮生千萬緒。  
長於春夢幾多  
時，散似秋雲  
無覓處。聞琴  
解佩神仙侶，  
挽斷羅衣留不  
住。勸君莫作

獨醒人，爛醉  
花間應有數。

木蘭花（晏  
殊） 池塘水綠  
風微暖，記得  
玉真初見面。  
重頭歌韻響琤

琮，入破舞腰  
紅亂旋。玉鉤  
闌下香階畔。  
醉後不知斜日  
晚。當時共我  
賞花人，點檢  
如今無一半。



木蘭花（晏  
殊） 綠楊芳草  
長亭路，年少  
拋人容易去。  
樓頭殘夢五更  
鐘，花底離愁  
三月雨。 無情

不似多情苦，  
一寸還成千萬  
縷。天涯地角  
有窮時，只有  
相思無盡處。

踏莎行（晏  
殊） 祖席離歌，

長亭別宴，香  
塵已隔猶四面。

居人匹馬映林  
嘶，行人去棹  
依波轉。畫閣  
魂消，高樓目  
斷，斜陽只送

平波遠。無窮

無盡是離愁，

天涯地角尋思

遍。

踏莎行（晏

殊）小徑紅稀，

芳郊綠遍，高

臺樹色陰陰見。

春風不解禁楊

花，濛濛亂撲

行人面。翠葉

藏鶯，朱簾隔

燕，爐香靜逐

游絲轉。一場

愁夢酒醒時，  
斜陽却照深深  
院。

蝶戀花（晏  
殊） 六曲闌干  
偎碧樹，楊柳  
風輕，展盡黃

金縷。誰把鈿  
箏移玉柱，穿  
簾海燕雙飛去。

滿眼游絲兼落  
絮，紅杏開時，  
一霎清明雨。  
濃睡覺來鶯亂

語，驚殘好夢  
無尋處。

鳳簫吟（韓  
鎮） 鎖離愁連  
綿無際，來時  
陌上初燠，繡  
幃人念遠，暗



垂珠露，泣送  
征輪。長行長  
在眼，更重重、  
遠水孤雲。但  
望極樓高，盡  
日目斷王孫。  
消魂，池塘別

後，曾行處、  
綠妒輕裙。慙  
時攜素手，亂  
花飛絮裏，緩  
步香茵。朱顏  
空自改，向年  
年、芳意長新。

遍綠野，嬉遊  
醉眼，莫負青  
春。

木蘭花（宋  
祁） 東城漸覺  
風光好，縠皺  
波紋迎客棹。

綠楊煙外曉雲  
輕，紅杏枝頭  
春意鬧。浮生  
長恨歡娛少，  
肯愛千金輕一  
笑？爲君持酒

勸斜陽，且向  
花間留晚照。

採桑子（歐陽  
修） 群芳過後

西湖好，狼籍

殘紅，飛絮濛

濛，垂柳闌干

盡日風。笙歌  
散盡遊人去，  
始覺春空，垂  
下簾櫳，雙燕  
歸來細雨中。

訴衷情（歐陽  
修） 清晨簾幕

卷輕霜，呵手  
試梅妝。都緣  
自有離恨，故  
畫作遠山長。  
思往事，惜流  
芳，易成傷。  
擬歌先斂，欲

笑還顰，最斷  
人腸。

踏莎行（歐陽  
修） 候館梅殘，  
溪橋柳細，草  
薰風暖搖征轡。

離愁漸遠漸無



窮，迢迢不斷  
如春水。寸寸  
柔腸，盈盈粉  
淚，樓高莫近  
危闌倚。平蕪  
盡處是春山，

行人更在春山  
外。

蝶戀花（歐陽  
修） 庭院深深  
深幾許？楊柳  
堆煙，簾幕無  
重數。玉勒雕

鞍遊冶處，樓  
高不見章臺路。

雨橫風狂三月  
暮，門掩黃昏，  
無計留春住。  
淚眼問花花不

語，亂紅飛過  
鞦韆去。

蝶戀花（歐陽  
修） 誰道閒情  
拋棄久？每到  
春來，惆悵還  
依舊。 日日花

前常病酒，不  
辭鏡裏朱顏瘦。

河畔青蕪堤上  
柳，爲問新愁，  
何事年年有？  
獨立小橋風滿

袖，平林新月  
人歸後。

蝶戀花（歐陽  
修） 幾日行雲  
何處去？忘了  
歸來，不道春  
將暮。百草千

花寒食路，香  
車繫在誰家樹？

淚眼倚樓頻獨  
語，雙燕來時，  
陌上相逢否？  
撩亂春愁如柳

絮，依依夢裏  
無尋處。

木蘭花（歐陽  
修） 別後不知  
君遠近，觸目  
淒涼多少悶！  
漸行漸遠漸無



書，水闊魚沉  
何處問？夜深  
風竹敲秋韻，  
萬葉千聲皆是  
恨。故欹單枕  
夢中尋，夢又  
不成燈又燼。

浪淘沙（歐陽  
修） 把酒祝東  
風，且共從容。

垂楊紫陌洛城  
東，總是當時  
攜手處，游遍  
芳叢。聚散苦

匆匆，此恨無窮。  
今年花勝去年紅，可惜  
明年花更好，  
知與誰同？

青玉案（歐陽修）  
一年春事

都來幾，早過  
了、三之二。

綠暗紅嫣渾可  
事，綠楊庭院，  
暖風簾幕，有  
個人憔悴。買  
花載酒長安市，

又爭似家山見  
桃李？不枉東  
風吹客淚，相  
思難表，夢魂  
無據，惟有歸  
來是。

曲玉管（柳  
永） 隴首雲飛，  
江邊日晚，煙  
波滿目憑闌久。  
一望關河蕭索，  
千里清秋，忍  
凝眸。杳杳神

京，盈盈仙子，  
別來錦字終難  
偶。斷雁無憑，  
冉冉飛下汀洲，  
思悠悠。暗想  
當初，有多少、  
幽歡佳會；豈

知聚散難期，

成雨恨雲愁。

阻追游，每登

山臨水，惹起

平生心事，一

場消黯，永日



無言，却下層  
樓。

雨霖鈴（柳  
永） 寒蟬淒切，  
對長亭晚，驟  
雨初歇。都門  
帳飲無緒，留

戀處、蘭舟催  
發。執手相看  
淚眼，竟無語  
凝噎。念去去、  
千里煙波，暮  
靄沉沉楚天闊。

多情自古傷離

別，更那堪、  
冷落清秋節！  
今宵酒醒何處？  
楊柳岸、曉風  
殘月。此去經  
年，應是良辰  
好景虛設。便

縱有千種風情，  
更與何人說。

蝶戀花（柳  
永） 佇倚危樓  
風細細，望極  
春愁，黯黯生  
天際。草色煙

光殘照裏，無  
言誰會憑闌意？

擬把疏狂圖一  
醉，對酒當歌，  
強樂還無味。  
衣帶漸寬終不

悔。爲伊消得  
人憔悴。

采蓮令（柳  
永） 月華收，  
雲淡霜天曙。  
西征客、此時  
情苦。 翠娥執

手，送臨歧、  
輶輶開朱戶。  
千嬌面、盈盈  
佇立，無言有  
淚，斷腸爭忍  
回顧？一葉蘭  
舟，便恁急將

凌波去。貪行  
色、豈知離緒，  
萬般方寸，但  
飲恨、脈脈同  
誰語？更回首、  
重城不見，寒



江天外，隱隱  
兩三煙樹。

浪淘沙慢（柳  
永） 夢覺透窗  
風一線，寒燈  
吹息。 那堪酒  
醒，又聞空階

夜雨頻滴。嗟

因循、久作天

涯客。負佳人、

幾許盟言，便

忍把、從前歡

會，陡頓成

憂戚。愁極。

再三追思，洞  
房深處，幾度  
飲散歌闌，香  
暖鴛鴦被。豈  
暫時疏散，費  
伊心力，殢雲  
尤雨，有萬般

千種，相憐相  
惜。恰到如今，  
天長漏永，無  
端自家疏隔。  
知何時、却擁  
秦雲態？願低  
幃昵枕，輕輕

細說與，江鄉  
夜夜，數寒更  
思憶。

定風波（柳  
永） 自春來、  
慘綠愁紅，芳  
心是事可可。

日上花梢，鶯  
穿柳帶，猶壓  
香衾臥。暖酥  
消、膩雲殢、  
終日厭厭倦梳  
裹。無那。  
恨薄情一去，

音書無個。早  
知恁麼，悔當  
初、不把雕鞍  
鎖。向雞窗，  
只與蠅箋象管，  
拘束教吟課。  
鎮相隨、莫拋

躲，針線閑拈  
伴伊坐。和我，  
免使年少光陰  
虛過。

少年游（柳  
永） 長安古道  
馬遲遲，高柳



亂蟬嘶。夕陽  
島外，秋風原  
上，目斷四天  
垂。歸雲一去  
無蹤跡，何處  
是前期？狎興  
生疏，酒徒蕭

索，不似去年  
時。

戚氏（柳永）

晚秋天，一霎  
微雨灑庭軒。

檻菊蕭疏，井  
梧零亂，惹殘

煙。淒然，望  
江關，飛雲黯  
淡夕陽閑。當  
時宋玉悲感，  
向此臨水與登  
山。遠道迢遞，  
行人淒楚，倦

聽隴水潺湲。

正蟬吟敗葉，

蛩響衰草，相

應喧喧。孤館

度日如年，風

露漸變，悄悄

至更闌。長天

淨，絳河清淺，  
皓月嬋娟。思  
綿綿，夜永對  
景，那堪屈指  
暗想從前。未  
名未祿，綺陌  
紅樓，往往經

歲遷延。帝里  
風光好，當年  
少日，暮宴朝  
歡。況有狂朋  
怪侶，遇當歌  
對酒竟留連。  
別來迅景如梭，

舊游似夢，煙  
水程何限？念  
利名、憔悴長  
縈絆，追往事、  
空慘愁顏。漏  
箭移，稍覺輕  
寒，漸嗚咽、

畫角數聲殘。

對閑窗畔，停

燈向曉，抱影

無眠。

夜半樂（柳

永）凍雲黯淡

天氣，扁舟一



葉，乘興離江  
渚。度萬壑千  
岩，越溪深處。

怒濤漸息，樵  
風乍起，更聞  
商旅相呼。片  
帆高舉，泛畫

鷁、翩翩過南  
浦。望中酒旆  
閃閃，一簇煙  
村，數行霜樹。

殘日下、漁人  
鳴榔歸去。敗  
荷零落，衰楊

掩映。岸邊兩  
兩三三，浣紗  
游女，避行客、  
含羞笑相語。  
到此因念，繡  
閣輕拋，浪萍  
難駐。嘆後約

叮嚀竟何據？

慘離懷、空恨

歲晚歸期阻。

凝淚眼、杳杳

神京路，斷鴻

聲遠長天暮。

玉蝴蝶（柳  
永） 望處雨收  
雲斷，憑闌悄  
悄，目送秋光。

晚景蕭疏，堪  
動宋玉悲涼。

水風輕、蘋花

漸老；月露冷、  
梧葉飄黃。遣  
情傷，故人何  
在？煙水茫茫。

難忘。文期  
酒會，幾孤風  
月，屢變星霜。

海闊山遙，未  
知何處是瀟湘？

念雙燕、難憑  
音信；指暮天、  
空識歸航。黯  
相望，斷鴻聲  
裏，立盡斜陽。

八聲甘州（柳  
永） 對蕭蕭暮  
雨灑江天，一  
番洗清秋。漸  
霜風淒緊，關  
河冷落，殘照  
當樓。是處紅



衰翠減，冉冉  
物華休。惟有  
長江水，無語  
東流。不忍登  
高臨遠，望故  
鄉渺邈，歸思  
難收。嘆年來

蹤跡，何事苦  
淹留？想佳人、  
妝樓顙望，誤  
幾回、天際識  
歸舟？爭知我、  
倚闌干處，正  
恁凝愁。

迷神引（柳  
永） 一葉扁舟  
輕帆卷，暫泊  
楚江南岸。孤  
城暮角，引胡  
笳怨。水茫茫，  
平沙雁。旋驚

散。煙斂寒林  
簇，畫屏展，  
天際遙山小，  
黛眉淺。舊賞  
輕拋，到此成  
遊宦。覺客程  
勞，年光晚。

異鄉風物，忍  
蕭索，當愁眼。

帝城賒，秦樓  
阻，旅魂亂。

芳草連空闊，  
殘照滿，佳人

無消息，斷雲  
遠。

竹馬子（柳

永）登孤壘荒

涼，危亭曠望，

靜臨煙渚。對

雌霓掛雨，雄

風拂檻，微收  
煩暑。漸覺一  
葉驚秋，殘蟬  
噪晚，素商時  
序。覽景想前  
歡，指神京、  
非霧非煙深處。

向此成追感，  
新愁易積，故  
人難聚。憑高  
盡日凝佇，羸  
得消魂無語。  
極目霽靄霏微，  
暝鴉零亂，蕭



索江城暮。南  
樓畫角，又送  
殘陽去。

桂枝香（王安  
石） 登臨送目，  
正故國晚秋，  
天氣初肅。千

里澄江似練，  
翠峰如簇。歸  
帆去棹殘陽裏，  
背西風，酒旗  
斜矗。彩舟雲  
淡，星河鷺起，  
畫圖難足。念

往昔、繁華競  
逐，嘆門外樓  
頭，悲恨相續。

千古憑高，對  
此漫嗟榮辱。

六朝舊事隨流  
水，但寒煙、

芳草凝綠。至今  
商女，時時  
猶唱，《後  
庭》遺曲。

千秋歲引（王  
安石） 別館寒  
砧，孤城畫角，

一派秋聲入寥廓。  
東歸燕從海上去，南來  
雁向沙頭落。  
楚臺風，庾樓  
月，宛如昨。  
無奈被些名利

縛，無奈被他  
情擔攔，可惜  
風流總閑却。  
當初漫留華表  
語，而今誤我  
秦樓約。夢闌

時，酒醒後，  
思量著。

清平樂（王安  
國） 留春不住，  
費盡鶯兒語。

滿地殘紅宮錦  
污，昨夜南園

風雨。小憐初  
上琵琶，曉來  
思繞天涯。不  
肯畫堂朱戶，  
春風自在楊花。

臨江仙（晏幾  
道） 夢後樓臺



高鎖，酒醒簾  
幕低垂。去年  
春恨却來時，  
落花人獨立，  
微雨燕雙飛。  
記得小蘋初見，  
兩重心字羅衣。

琵琶弦上說相思，當時明月  
在，曾照彩雲  
歸。

蝶戀花（晏幾  
道） 夢入江南  
煙水路，行盡

江南，不與離  
人遇。睡裏消  
魂無說處，覺  
來惆悵消魂誤。

欲盡此情書尺  
素，浮雁沉魚，  
終了無憑據。

却倚緩弦歌別  
緒，斷腸移破  
秦箏柱。

蝶戀花（晏幾  
道） 醉別西樓  
醒不記，春夢  
秋雲，聚散真

容易。斜月半  
窗還少睡，畫  
屏閑展吳山翠。

衣上酒痕詩裏  
字，點點行行，  
總是淒涼意。

紅燭自憐無好

計，夜寒空替  
人垂淚。

鷓鴣天（晏幾  
道） 彩袖殷勤  
捧玉鍾，當年  
拚却醉顏紅。  
舞低楊柳樓心

月，歌盡桃花  
扇底風。從別  
後，憶相逢，  
幾回魂夢與君  
同。今宵剩把  
銀釭照，猶恐  
相逢是夢中。

生查子（晏幾  
道） 關山魂夢  
長，塞雁音書  
少。兩鬢可憐  
青，只爲相思  
老。歸傍碧紗  
窗，說與人人



道：真箇別離  
難，不似相逢  
好。

木蘭花（晏幾  
道） 東風又作  
無情計，艷粉  
嬌紅吹滿地。

碧樓簾影不遮  
愁，還似去年  
今日意。誰知  
錯管春殘事，  
到處登臨曾費  
淚。此時金盞

直須深，看盡  
落花能幾醉。

木蘭花（晏幾  
道） 鞦韆院落  
重簾暮，彩筆  
閑來題繡戶。  
牆頭丹杏雨餘

花，門外綠楊  
風後絮。朝雲  
信斷知何處？  
應作襄王春夢  
去。紫騮認得  
舊游蹤，嘶過  
畫橋東畔路。

清平樂（晏幾  
道） 留人不住，  
醉解蘭舟去。  
一棹碧濤春水  
路，過盡曉鶯  
啼處。 渡頭楊  
柳青青。 枝枝

葉葉離情。此  
後錦書休寄，  
畫樓雲雨無憑。  
阮郎歸（晏幾  
道） 舊香殘粉  
似當初，人情  
恨不如。一春

猶有數行書，  
秋來書更疏。  
衾鳳冷，枕鴛  
孤，愁腸待酒  
舒。夢魂縱有  
也成虛，那堪  
和夢無。

阮郎歸（晏幾  
道） 天邊金掌  
露成霜，雲隨  
雁字長。綠杯  
紅袖趁重陽，  
人情似故鄉。  
蘭佩紫，菊簪



黃，殷勤理舊  
狂。欲將沉醉  
換悲涼，清歌  
莫斷腸。

六么令（晏幾  
道）綠陰春盡，  
飛絮繞香閣。

晚來翠眉宮樣，

巧把遠山學。

一寸狂心未說，

已向橫波覺。

畫簾遮匝，新

曲妙，暗許

閑人帶偷掐。

前度書多隱語，

意淺愁難答。

昨夜詩有四文，

韻險還慵押。

都待笙歌散了，

記取來時霎。

不消紅蠟，閑

雲歸後，月在  
庭花舊闌角。

御街行（晏幾  
道） 街南綠樹  
春饒絮，雪滿  
遊春路。 樹頭  
花艷雜嬌雲，

樹底人家朱戶。

北樓閑上，疏  
簾高卷，直見  
街南樹。闌干  
倚盡猶慵去，  
幾度黃昏雨。  
晚春盤馬踏青

苔，曾傍綠陰  
深駐。落花猶  
在，香屏空掩，  
人面知何處？  
虞美人（晏幾  
道） 曲闌干外  
天如水，昨夜

還曾倚。初將  
明月比佳期，  
長向月圓時候、  
望人歸。羅衣  
著破前香在，  
舊意誰教改。  
一春離恨懶調

弦。猶有兩行  
閑淚、寶箏前。

留春令（晏幾  
道） 畫屏天畔，  
夢回依約，十  
洲雲水。手拈  
紅箋寄人書，



寫無限、傷春  
事。別浦高樓  
曾漫倚，對江  
南千里。樓下  
分流水聲中，  
有當日、憑高  
淚。

思遠人（晏幾  
道） 紅葉黃花  
秋意晚，千里  
念行客。飛雲  
過盡，歸鴻無  
信，何處寄書  
得？淚彈不盡

臨窗滴，就硯  
旋研墨。漸寫  
到別來，此情  
深處，紅箋爲  
無色。

水調歌頭（蘇  
軾）（丙辰中

秋，歡飲達旦，  
大醉，作此篇，  
兼懷子由。）

明月幾時有，  
把酒問青天。  
不知天上宮闕，  
今夕是何年。

我欲乘風歸去，  
惟恐瓊樓玉宇，  
高處不勝寒。  
起舞弄清影，  
何似在人間。  
轉朱閣，低綺  
戶，照無眠。

不應有恨，何  
事長向別時圓？

人有悲歡離合，  
月有陰晴圓缺，  
此事古難全。  
但願人長久，  
千里共嬋娟。

水龍吟（蘇軾）  
（次韻章質夫《楊花詞》）

似花還似非花，  
也無人惜從教墜。  
拋家傍路，

思量却是，無  
情有思。縈損  
柔腸，困酣嬌  
眼，欲開還閉。

夢隨風萬里，  
尋郎去處，又  
還被鶯呼起。



不恨此花飛盡，  
恨西園、落紅  
難綴。曉來雨  
過，遺蹤何在？  
一池萍碎。

春色三分，二  
分塵土，一分

流水。細看來  
不是楊花，點  
點是離人淚。

永遇樂（蘇  
軾）（彭城夜  
宿燕子樓，夢

盼盼，因作此  
詞。）

明月如霜，好  
風如水，清景  
無限。曲港跳  
魚，圓荷瀉露，  
寂寞無人見。

紉如三鼓，鏗  
然一葉，黯黯  
夢雲驚斷。夜  
茫茫、重尋無  
處，覺來小園  
行遍。天涯倦  
客，山中歸路，

望斷故園心眼。

燕子樓空，佳人何在？空鎖樓中燕。古今如夢，何曾夢覺，但有舊歡新怨。異時對、

黃樓夜景，爲  
余浩嘆。

洞仙歌（蘇  
軾）（小序  
略）

冰肌玉骨，自  
清涼無汗。水

殿風來暗香滿。

繡簾開、一點

明月窺人，人

未寢，欹枕釵

橫鬢亂。起來

攜素手，庭戶

無聲，時見疏

星渡河漢。試  
問夜如何？夜  
已三更，金波  
淡、玉繩低轉。

但屈指、西風  
幾時來，又不



道流年、暗中  
偷換。

卜算子（蘇  
軾）（黃州定  
惠院寓居作）

缺月掛疏桐，  
漏斷人初靜。

誰見幽人獨往  
來，縹緲孤鴻  
影。驚起却回  
頭，有恨無人  
省。揀盡寒枝  
不肯棲，寂寞  
沙洲冷。

青玉案（蘇軾）  
（送伯固歸吳中）

三年枕上吳中路，  
遣黃犬、隨君去。  
若到松江呼小渡，

莫驚鴛鴦，四  
橋盡是、老子  
經行處。輞川  
圖上看春暮，  
常記高人右丞  
句。作個歸期  
天定許，春衫

猶是，小蠻針  
線，曾濕西湖  
雨。

臨江仙（蘇  
軾） 夜飲東坡  
醒復醉，歸來  
彷彿三更。 家

童鼻息已雷鳴，  
敲門都不應，  
倚杖聽江聲。  
長恨此身非我  
有，何時忘却  
營營。夜闌風  
靜縠紋平，小

舟從此逝，江  
海寄餘生。

定風波（蘇

軾）（三月七

日沙湖道中遇

雨，雨具先去，

同行皆狼狽，

余不覺。已而  
天晴，故作  
此。）

莫聽穿林打葉  
聲，何妨吟嘯  
且徐行。竹杖  
芒鞋輕勝馬，



誰怕？一蓑煙  
雨任平生。料  
峭春風吹酒醒，  
微冷，山頭斜  
照却相迎。回  
首向來蕭瑟處，

歸去，也無風  
雨也無晴。

江城子（蘇  
軾）（乙卯正  
月二十日夜記  
夢）

十年生死兩茫茫，  
不思量，  
自難忘。千里  
孤墳，無處話  
淒涼。縱使相  
逢應不識，塵  
滿面、鬢如霜。

夜來幽夢忽還鄉，小軒窗，  
正梳妝。相顧無言，惟有淚  
千行。料得年年腸斷處，明  
月夜、短松岡。

賀新郎（蘇軾）  
乳燕飛華屋，悄無人、槐陰轉午，晚涼新浴。手弄生綃白團扇，扇手一時似玉。

漸困倚、孤眠  
清熟，簾外誰  
來推繡戶？枉  
教人、夢斷

《瑤臺曲》，  
又却是、風敲  
竹。石榴半吐

紅巾蹙，待浮  
花、浪蕊都盡，  
伴君幽獨。 穠  
艷一枝細看取，  
芳意千重似束。

又恐被西風驚  
綠，若待得君

來向此，花前  
對酒不忍觸。

共粉淚、兩簌  
簌。

望海潮（秦  
觀） 梅英疏淡，  
冰漸溶泄，東



風暗換年華。

金谷俊游，銅

駝巷陌，新晴

細履平沙。長

記誤隨車，正

絮蝶舞，芳

思交加。柳下

桃蹊，亂分春色  
到人家。西  
園夜飲鳴笳，  
有華燈礙月，  
飛蓋妨花。蘭  
苑未空，行人  
漸老，重來是

事堪嗟。煙暝  
酒旗斜。但倚  
樓極目，時見  
樓鴉。無奈歸  
心。暗隨流水  
到天涯。

八六子（秦  
觀） 倚危亭、

恨如芳草，萋  
萋劃盡還生。

念柳外青驄別  
後，水邊紅袂  
分時，愴然暗

驚。無端天與  
娉婷，夜月一  
簾幽夢，春風  
十里柔情。怎  
奈向、歡娛漸  
隨流水，素弦  
聲斷，翠綃香

減。 那堪片片

飛花弄晚，濛

濛殘雨籠晴。

正銷凝，黃鸝

又啼數聲。

滿庭芳（秦

觀） 山抹微雲，

天黏衰草，畫

角聲斷譙門。

暫停徵棹，聊

共引離樽。多

少蓬萊舊事，

空回首、煙靄

紛紛。斜陽外，

寒鴉萬點，流水繞孤村。銷魂，當此際，香囊暗解，羅帶輕分。漫贏得青樓，薄倖名存。此去何



時見也？襟袖  
上、空惹啼痕。

傷情處，高城  
望斷，燈火已  
黃昏。

滿庭芳（秦  
觀）曉色雲開，

春隨人意，驟  
雨才過還晴。  
古臺芳榭，飛  
燕蹴紅英。舞  
困榆錢自落，  
鞦韆外、綠水  
橋平。東風裏，

朱門映柳，低  
按小秦箏。多  
情，行樂處，  
珠鈿翠蓋，玉  
轡紅纓。漸酒  
空金榼，花困  
蓬瀛。豆蔻梢

頭舊恨，十年  
夢，屈指堪驚。

憑闌久，疏煙  
淡日，寂寞下  
燕城。

減字木蘭花

（秦觀） 天涯

舊恨，獨自淒  
涼人不問。欲  
見回腸，斷盡  
金爐小篆香。  
黛蛾長斂，任  
是春風吹不展。

困倚危樓，過  
盡飛鴻字字愁。

浣溪沙（秦  
觀） 漠漠輕寒

上小樓，曉陰

無賴似窮秋，

淡煙流水畫屏

幽。自在飛花  
輕似夢，無邊  
絲雨細如愁，  
寶簾閑掛小銀  
鉤。

阮郎歸（秦  
觀） 湘天風雨

破寒初，深沉  
庭院虛。 簾譙  
吹罷小單于，  
迢迢清夜徂。  
鄉夢斷，旅魂  
孤， 崢嶸歲又  
除。 衡陽猶有



雁傳書，柳陽  
和雁無。

綠頭鴨（晁元  
禮） 晚雲收，  
淡天一片琉璃。

爛銀盤、來從  
海底，皓色千

里澄輝。螢無  
塵、素娥淡佇，  
靜可數、丹桂  
參差。玉露初  
零，金風未凜，  
一年無似此佳  
時。露坐久、

疏螢時度，烏  
鵲正南飛。瑤  
臺冷，欄干憑  
暖，欲下遲遲。

念佳人、音塵  
別後，對此應  
解相思。最關

情、漏聲正永，  
暗斷腸、花影  
偷移。料得來  
宵，清光未減，  
陰晴天氣又爭  
知。共凝戀、  
如今別後，還

是隔年期。人  
強健，清樽素  
影，長願相隨。

蝶戀花（趙令  
時） 欲減羅衣

寒未去，不捲  
珠簾，人在深

深處。紅杏枝  
頭花幾許？啼  
痕止恨清明雨。

盡日沉煙香一  
縷，宿酒醒遲，  
惱破春情緒。  
飛燕又將歸信

誤，小屏風上  
西江路。

蝶戀花（趙令  
時） 卷絮風頭  
寒欲盡，墜粉  
飄香，日日紅  
成陣。新酒又

添殘酒困，今  
春不減前春恨。

蝶去鶯飛無處  
問，隔水高樓，  
望斷雙魚信。  
惱亂橫波秋一



寸，斜陽只與  
黃昏近。

清平樂（趙令  
時） 春風依舊，  
著意隨堤柳。  
搓得鵝兒黃欲  
就，天氣清明

時候。去年紫  
陌青門，今宵  
雨魄雲魂。斷  
送一生憔悴，  
只消幾個黃昏？  
水龍吟（晁補  
之）（次韻林

聖予《惜  
春》）

問春何苦匆匆，  
帶風伴雨如馳  
驟。幽葩細萼，  
小園低檻，壅  
培未就。吹盡

繁紅，占春長  
久，不如垂柳。

算春常不老，  
人愁春老，愁  
只是、人間有。

春恨十常八九，  
忍輕孤、芳醪

經口。那知自  
是、桃花結子，  
不因春瘦。世  
上功名，老來  
風味，春歸時  
候。最多情猶

有，樽前青眼，  
相逢依舊。

憶少年（晁補  
之）（別歷  
下）

無窮官柳，無  
情畫舸，無根

行客。南山尚  
相送，只高城  
人隔。罨畫園  
林溪紺碧，算  
重來、盡成陳  
跡。劉郎鬢如

此，況桃花顏色。  
色。

洞仙歌（晁補  
之）（泗州中  
秋作）

青煙幕處，碧  
海飛金鏡。永



夜闌階臥桂影。

露涼時，零亂

多少寒蟬，神

京遠，惟有藍

橋路近。水晶

簾不下，雲母

屏開，冷浸佳

人淡脂粉。待  
都將許多明，  
付與金樽，投  
曉共流霞傾盡。

更攜取胡床上  
南樓，看玉做

人間，素鞦韆  
頃。

臨江仙（晁沖  
之） 憶昔西池  
池上飲，年年  
多少歡娛。別  
來不寄一行書，

尋常相見了，

猶道不如初。

安穩錦衾今夜

夢，月明好渡

江湖。相思休

問定何如？情

知春去後，管  
得落花無。

虞美人（舒  
亶） 芙蓉落盡  
天涵水，日暮  
滄波起。背飛  
雙燕貼雲寒，

獨向小樓東畔  
倚闌看。浮生  
只合樽前老，  
雪滿長安道。  
故人早晚上高  
臺，寄我江南  
春色一枝梅。

漁家傲（朱  
服） 小雨纖纖  
風細細，萬家  
楊柳青煙裏。  
戀樹濕花飛不  
起，愁無際，  
和春付與東流

水。九十光陰  
能有幾？金龜  
解盡留無計。  
寄語東陽沽酒  
市，拚一醉，  
而今樂事他年  
淚。



惜分飛（毛滂）  
（富陽僧舍作別語贈妓瓊芳）

淚濕闌乾花著露，愁到眉峰  
碧聚。此恨平

分取，更無言  
語空相覷。斷  
雨殘雲無意緒，  
寂寞朝朝暮暮。

今夜山深處，  
斷魂分付潮回  
去。

菩薩蠻（陳  
克） 赤闌橋盡

香街直，籠街

細柳嬌無力。

金碧上青空，

花晴簾影紅。

黃衫飛白馬，

日日青樓下。

醉眼不逢人，

午香吹暗塵。

菩薩蠻（陳

克） 綠蕪牆繞

青苔院，中庭

日淡芭蕉卷。

蝴蝶上階飛，

烘簾自在垂。

玉鉤雙語燕，

寶甃楊花轉。

幾處簸錢聲，

綠窗春睡輕。

洞仙歌（李元  
膺）（小序  
略）

雪雲散盡，放  
曉晴庭院。楊  
柳於人便青眼。  
更風流多處，

一點梅心，相  
映遠，約略顰  
輕笑淺。一年  
春好處，不在  
濃芳，小艷疏  
香最嬌軟。到  
清明時候，百

紫千紅花正亂，  
已失春風一半。

早占取、韶光  
共追游，但莫  
管春寒，醉紅  
自暖。



青門飲（時  
彥） 胡馬嘶風，  
漢旗 雪，彤  
雲又吐，一竿  
殘照。 古木連  
空，亂山無數，  
行盡暮沙衰草。

星斗橫幽館，  
夜無眠燈花空  
老。霧濃香鴨，  
冰凝淚燭，霜  
天難曉。長記  
小妝才了，一  
杯未盡，離懷

多少。醉裏秋  
波，夢中朝雨，  
都是醒時煩惱，  
料有牽情處，  
忍思量耳邊曾  
道。甚時躍馬

歸來，認得迎  
門輕笑。

謝池春（李之  
儀） 殘寒消盡，  
疏雨過、清明  
後。花徑款餘  
紅，風沼縈新

顰。乳燕穿庭  
戶，飛絮沾襟  
袖。正佳時仍  
晚晝，著人滋  
味，真箇濃如  
酒。頻移帶眼，  
空只恁厭厭瘦。

不見又思量，  
見了還依舊。  
爲問頻相見，  
何似長相守？  
天不老，人未  
偶，且將此恨，  
分付庭前柳。

卜算子（李之儀）  
我住長江頭，君住長江尾；  
日日思君不見君，共飲長江水。  
此水幾時休？此恨

何時已？只願  
君心似我心，  
定不負相思意。

瑞龍吟（周邦  
彥）章臺路，  
還見褪粉梅梢，  
試花桃樹。憎



憎坊陌人家，  
定巢燕子，歸  
來舊處。黯凝  
佇，因念個人  
痴小，乍窺門  
戶。侵晨淺約  
宮黃，障風映

袖，盈盈笑語。

前度劉郎重到，  
訪鄰尋里，同  
時歌舞，惟有  
舊家秋娘，聲  
價如故。吟箋  
賦筆，猶記燕

臺句。知誰伴，  
名園露飲，東  
城閑步？事與  
孤鴻去，探春  
盡是，傷離意  
緒。官柳低金  
縷，歸騎晚、

纖纖池塘飛雨。

斷腸院落，一  
簾風絮。

風流子（周邦  
彥） 新綠小池  
塘，風簾動、  
碎影舞斜陽。

羨金屋去來，  
舊時巢燕；土  
花繚繞，前度  
莓牆。繡閣裏、  
鳳幃深幾許？  
聽得理絲簧。  
欲說又休，慮

乖芳信；未歌  
先噎，愁近清  
觴。遙知新妝  
了，開朱戶、  
應自待月西廂。

最苦夢魂，今  
宵不到伊行。

問甚時說與，  
佳音密耗，寄  
將秦鏡，偷換  
韓香？ 天便教  
人，霎時廝見  
何妨！

蘭陵王（周邦  
彥） 柳陰直，  
煙裏絲絲弄碧。

隋堤上、曾見  
幾番，拂水飄  
綿送行色。登  
臨望故國，誰



識、京華倦客。

長亭路、年去  
歲來，應折柔  
條過千尺。閑  
尋舊蹤跡，又  
酒趁哀弦，燈  
照離席，梨花

榆火催寒食。

愁一箭風快，

半篙波暖，回

頭迢遞便數驛，

望人在天北。

淒惻，恨堆積。

漸別浦縈回，

津堠岑寂，斜  
陽冉冉春無極。

念月榭攜手，  
露橋聞笛，沈  
思前事，似夢  
裏、淚暗滴。

瑣寒窗（周邦  
彥） 暗柳啼鴉，  
單衣佇立，小  
簾朱戶。桐花  
半畝，靜鎖一  
庭愁雨。灑空  
階、夜闌未休，

故人剪燭西窗  
語。似楚江暝  
宿，風燈零亂，  
少年羈旅。遲  
暮，嬉遊處。  
正店舍無煙，  
禁城百五。旗

亭喚酒，付與  
高陽儔侶。想  
東園、桃李自  
春，小唇秀靨  
今在否？到歸  
時、定有殘英，  
待客攜樽俎。

六丑（周邦  
彥）（薔薇謝  
後作）

正單衣試酒，  
悵客裏、光陰  
虛擲。願春暫  
留，春歸如過

，一去無跡。

爲問家何在？

夜來風雨，葬

楚宮傾國。釵

鈿墮處遺香澤，

亂點桃蹊，輕

柳陌。多情



爲誰追惜？但  
蜂媒蝶使，時  
叩窗櫺。東園  
岑寂，漸朦朧  
暗碧，靜繞珍  
叢底。成嘆息：  
長條故惹行客，

似牽衣待話，  
別情無極。殘  
英小、強簪巾  
幘，終不似、  
一朵釵頭顫裊，  
向人欹側。漂  
流處、莫趁潮

汐，恐斷紅、  
尚有相思字，  
何由見得？

夜飛鵲（周邦  
彥） 河橋送人  
處，涼夜何其。

斜月遠、墮餘

輝，銅盤燭淚  
已流盡，霏霏  
涼露沾衣。相  
將散離會，採  
風前津鼓，樹  
杪參旗。華驄  
會意，縱揚鞭、

亦自行遲。迢  
遞路回清野，  
人語漸無聞，  
空帶愁歸。何  
意重經前地，  
遺鈿不見，斜  
徑都迷。兔葵

燕麥，向斜陽  
欲與人齊。但  
徘徊班草，歎  
虛酌酒，極望  
天西。

滿庭芳（周邦  
彥）（夏日溧  
水無想山作）

風老鶯雛，雨  
肥梅子，午陰  
嘉樹清圓。地  
卑山近，衣潤

費爐煙。人靜  
烏鳶自樂，小  
橋外、新綠濺  
濺。憑欄久，  
黃蘆苦竹，疑  
泛九江船。年  
年，如社燕，



飄流瀚海，來  
寄修椽。且莫  
思身外，長近  
樽前。憔悴江  
南倦客，不堪  
聽、急管繁弦。  
歌筵畔，先安

枕簟，容我醉  
時眠。

過秦樓（周邦  
彥） 水浴清蟾，  
葉喧涼吹，巷  
陌馬聲初斷。  
閑依露井，笑

撲流螢，惹破  
畫羅輕扇。人  
靜夜久憑闌，  
愁不歸眠，立  
殘更箭。嘆年  
華一瞬，人今  
千里，夢沉書

遠。空見說鬢  
怯瓊梳，容消  
金鏡，漸懶趁  
時勻染。梅風  
地溽，虹雨苔  
滋，一架舞紅  
都變。誰信無

聊爲伊，才減  
江淹，情傷荀  
倩。但明河影  
下，還看稀星  
數點。

花犯（周邦  
彥）粉牆低，

梅花照眼，依  
然舊風味。露  
痕輕綴，疑淨  
洗鉛華，無限  
佳麗。去年勝  
賞曾孤倚，冰  
盤同燕喜。更

可惜、雪中高  
樹，香篝熏素  
被。今年對花  
最匆匆，相逢  
似有恨，依依  
愁悴。吟望久，  
青苔上，旋看

飛墜。相將見、  
翠丸薦酒，人  
正在、空江煙  
浪裏。但夢想、  
一枝蕭灑，黃  
昏斜照水。



大酺（周邦  
彥）對宿煙收，  
春禽靜，飛雨  
時鳴高屋。牆  
頭青玉旆，洗  
鉛霜都盡，嫩  
梢相觸。潤逼

琴絲，寒侵枕  
障，蟲網吹黏  
簾竹。郵亭無  
人處，聽檐聲  
不斷，困眠初  
熟。奈愁極頻  
驚，夢輕難記，

自憐幽獨。行人歸意速，最先念、流潦妨車轂。怎奈向、蘭成憔悴，衛玠清羸，等閑時、易傷心目。

未怪平陽客，  
雙淚落、笛中  
哀曲。況蕭索、  
青蕪國，紅糝  
鋪地，門外荊  
桃如菽。夜遊  
共誰秉燭？

解語花（周邦  
彥）（上元）

風消焰蠟，露  
浥烘爐，花市  
光相射。桂華  
流瓦，纖雲散、  
耿耿素娥欲下。

衣裳淡雅，看  
楚女纖腰一把。

簫鼓喧、人影  
參差，滿路飄  
香麝。因念都  
城放夜，望千  
門如畫，嬉笑

遊冶。 鈿車羅

帕，相逢處、

自有暗塵隨馬。

年光是也，惟

只見、舊情衰

謝。 清漏移、

飛蓋歸來，從  
舞休歌罷。

蝶戀花（周邦  
彥） 月皎驚烏  
棲不定，更漏  
將闌，輾轉牽  
金井。喚起兩



眸清炯炯，淚  
花落枕紅綿冷。

執手霜風吹鬢  
影，去意徊徨，  
別語愁難聽。  
樓上闌干橫斗

柄，露寒人遠  
雞相應。

解連環（周邦  
彥） 怨懷無托，  
嗟情人斷絕，  
信音遼邈。縱  
妙手、能解連

環，似風散雨  
收，霧輕雲薄。

燕子樓空，暗  
塵鎖、一床弦  
索。想移根換  
葉，盡是舊時，  
手種紅藥。汀

洲漸生杜若，  
料舟依岸曲，  
人在天角。漫  
記得、當日音  
書，把閑語閑  
言，待總燒却。

水驛春回，望

寄我、江南梅  
萼。拚今生、  
對花對酒，爲  
伊淚落。

拜星月慢（周  
邦彥） 夜色催  
更，清塵收露，

小曲幽坊月暗。

竹檻燈窗，識

秋娘庭院。笑

相遇，似覺瓊

枝玉樹相倚，

暖日明霞光爛。

水盼蘭情，總

平生稀見。畫  
圖中，舊識春  
風面，誰知道、  
自到瑤臺畔。  
眷戀雨潤雲溫，  
苦驚風吹散。  
念荒寒、寄宿

無人館，重門  
閉，敗壁秋蟲  
嘆。怎奈向、  
一縷相思，隔  
溪山不斷。

關河令（周邦  
彥） 秋陰時晴



漸向暝，變一  
庭淒冷。佇聽  
寒聲，雲深無  
雁影。更深人  
去寂靜。但照  
壁、孤燈相映。

酒已都醒，如  
何消夜永？  
綺寮怨（周邦  
彥） 上馬人扶  
殘醉，曉風吹  
未醒。映水曲、  
翠瓦朱檐，垂

楊裏、乍見津  
亭。當時曾題  
敗壁，蛛絲罩、  
淡墨苔暈青。  
念去來、歲月  
如流，徘徊久、  
嘆息愁思盈。

去去倦尋路程，  
江陵舊事，何  
曾再問楊瓊。

舊曲淒清，斂  
愁黛、與誰聽？

樽前故人如在，  
想念我、最關

情。何須渭城，  
歌聲未盡處，  
先淚零。

尉遲杯（周邦  
彥） 隋堤路，  
漸日晚、密靄  
生煙樹。陰陰

淡月籠沙，還

宿河橋深處。

無情畫舸，都

不管、煙波隔

前浦。等行人、

醉擁重衾，載

將離恨歸去。

因思舊客京華，  
長偎傍疏林，  
小檻歡聚。治  
葉倡條俱相識，  
仍慣見珠歌翠  
舞。如今向、  
漁村水驛，夜

如歲、焚香獨  
自語。 有何人、  
念我無聊，夢  
魂凝想鴛侶。

西河（周邦  
彥）（金陵懷  
古）



佳麗地，南朝  
盛事誰記？山  
圍故國繞清江，  
髻鬟對起。怒  
濤寂寞打孤城，  
風檣遙度天際。

斷崖樹，猶倒

倚，莫愁艇子  
誰繫？空餘舊  
跡鬱蒼蒼，霧  
沈半壘。夜深  
月過女牆來，  
傷心東望淮水。  
酒旗戲鼓甚處

市？想依稀王  
謝鄰里，燕子  
不知何世，向  
尋常巷陌人家  
相對，如說興  
亡斜陽裏。

瑞鶴仙（周邦  
彥） 悄郊原帶  
郭，行路永、  
客去車塵漠漠。

斜陽映山落，  
斂餘紅猶戀，  
孤城欄角。凌

波步弱，過短  
亭、何用素約。

有流鶯勸我，  
重解繡鞍，緩  
引春酌。不記  
歸時早暮，上  
馬誰扶，醒眠

朱閣。驚飈動  
幕，扶殘醉、  
繞紅藥。嘆西  
園已是，花深  
無地，東風何  
事又惡？任流

光過却，猶喜  
洞天自樂。

浪淘沙慢（周  
邦彥） 晝陰重，  
霜凋岸草，霧  
隱城堞。南陌  
脂車待發，東

門帳飲乍闌。

正拂面、垂楊

堪攬結，掩紅

淚、玉手親折。

念漢浦、離鴻

去何許？經時

信音絕。情切，



望中地遠天闊，  
白露冷、風清  
無人處，耿耿  
寒漏咽。嗟萬  
事難忘，惟是  
輕別。翠樽未  
竭，憑斷雲、

留取西樓殘月。

羅帶光消紋袞

疊，連環解、

舊香頓歇；怨

歌永、瓊壺敲

盡缺。恨春去、

不與人期，弄

夜色、空餘滿  
地梨花雪。

應天長（周邦  
彥） 條風布暖，  
霏霧弄晴，池  
塘遍滿春色。  
正是夜堂無月，

沉沉暗寒食。

梁間燕，前社

客。似笑我、

閉門愁寂。亂

花過、隔院芸

香，滿地狼藉。

長記那回時，

邂逅相逢，郊  
外駐油壁。又  
見漢宮傳燭，  
飛煙五侯宅。  
青青草，迷路  
陌。強載酒、  
細尋前跡。市

橋遠、柳下人  
家，獨自相識。

夜遊宮（周邦  
彥） 葉下斜陽

照水，卷輕浪、

沉沉千里。橋

上酸風射眸子，

立多時，看黃  
昏燈火市。古  
屋寒窗底，聽  
幾片、井桐飛  
墜。不戀單衾  
再三起，有誰

知，爲蕭娘書  
一紙？

青玉案（賀  
鑄） 凌波不過  
橫塘路，但目  
送、芳塵去。  
錦瑟華年誰與



度？ 月橋花院，  
瑣窗朱戶，只  
有春知處。 飛  
雲冉冉蘅皋暮，  
彩筆新題斷腸  
句。 試問閑愁  
都幾許？ 一川

煙草，滿城風  
絮，梅子黃時  
雨。

感皇恩（賀  
鑄） 蘭芷滿汀  
洲，游絲橫路。  
羅襪塵生步迎

顧，整鬟顰黛，  
脈脈兩情難語。

細風吹柳絮、  
人南渡。回首  
舊游，山無重  
數。花底深、  
朱戶何處？半

黃梅子，向晚  
一簾疏雨。斷  
魂分付與、春  
將去。

薄倖（賀鑄）

淡妝多態，更  
的的、頻回眄

睽。便認得琴  
心先許，欲綰  
合歡雙帶。記  
畫堂、風月逢  
迎，輕顰淺笑  
嬌無奈。向睡  
鴨爐邊，翔鴛

屏裏，羞把香  
羅暗解。自過  
了燒燈後，都  
不見踏青挑菜。

幾回憑雙燕，  
丁寧深意，往  
來却恨重簾礙。

約何時再，正  
春濃酒困，人  
閑晝永無聊賴。

厭厭睡起，猶  
有花梢日在。

浣溪沙（賀  
鑄） 不信芳春

厭老人，老人  
幾度送餘春，  
惜春行樂莫辭  
頻。巧笑艷歌  
皆我意，惱花  
顛酒拚君瞋，



物情惟有醉中  
真。

浣溪沙（賀  
鑄） 樓角初消  
一縷霞，淡黃  
楊柳暗棲鴉，  
玉人和月摘梅

花。笑捻粉香  
歸洞戶，更垂  
簾幕攬窗紗，  
東風寒似夜來  
些。

石州慢（賀  
鑄）薄雨收寒，

斜照弄晴，春  
意空闊。長亭  
柳色才黃，倚  
馬何人先折？  
煙橫水漫，映  
帶幾點歸鴻，  
平沙消盡龍荒

雪。猶記出關  
來，恰如今時  
節。將發，畫  
樓芳酒，紅淚  
清歌，便成輕  
別。回首經年，  
杳杳音塵都絕。

欲知方寸，共  
有幾許新愁？  
芭蕉不展丁香  
結。憔悴一天  
涯，兩厭厭風  
月。

蝶戀花（賀  
鑄） 幾許傷春  
春復暮，楊柳  
清陰，偏礙游  
絲度。天際小  
山桃葉步，白  
蘋花滿湔裙處。

竟日微吟長短句，  
簾影燈昏，  
心寄胡琴語。  
數點雨聲風約  
住，朦朧淡月  
雲來去。

天門謠（賀  
鑄）（登採石  
蛾眉亭）

牛渚天門險，  
限南北、七雄  
豪占。清霧斂，  
與閑人登覽。



待月上潮平波  
澹澹，塞管輕  
吹新《阿濫》。

風滿檻，歷歷  
數、西州更點。

天香（賀鑄）

煙絡橫林，山

沉遠照，迤邐  
黃昏鐘鼓。燭  
映簾櫳，蛩催  
機杼，共苦清  
秋風露。不眠  
思婦，齊應和、  
幾聲砧杵。驚

動天涯倦宦，  
駸駸歲華行暮。

當年酒狂自負，  
謂東君、以春  
相付。 流浪征  
驂北道，客檣  
南浦，幽恨無

人晤語。 賴明  
月曾知舊游處，  
好伴雲來，還  
將夢去。

望湘人（賀  
鑄） 厭鶯聲到  
枕，花氣動簾，

醉魂愁夢相半。

被惜餘熏，帶  
驚剩眼，幾許  
傷春春晚。淚  
竹痕鮮，佩蘭  
香老，湘天濃  
暖。記小江風

月佳時，屢約  
非煙遊伴。須  
信鸞弦易斷，  
奈雲和再鼓，  
曲終人遠。認  
羅襪無蹤，舊  
處弄波清淺。

青翰棹檣，白  
蘋洲畔，盡目  
臨皋飛觀。不  
解寄、一字相  
思，幸有歸來  
雙燕。

綠頭鴨（賀  
鑄） 玉人家，  
畫樓珠箔臨津。  
托微風彩簫流  
怨，斷腸馬上  
曾聞。宴堂開、  
艷妝叢裏，調



琴思、認歌聲。

麝蠟煙濃，玉  
蓮漏短，更衣  
不待酒初醺。  
繡屏掩、枕鴛  
相就，香氣漸  
暝暝。迴廊影、

疏鐘淡月，幾  
許消魂？翠釵  
分、銀箋封淚，  
舞鞋從此生塵。

任蘭舟、載將  
離恨，轉南浦、  
背西曛。記取

明年，薔薇謝  
後，佳期應未  
誤行雲。鳳城  
遠、楚梅香嫩，  
先寄一枝春。  
青門外，只憑

芳草，尋訪郎  
君。

石州慢（張元  
幹） 寒水依痕，  
春意漸回，沙  
際煙闊。溪梅  
晴照生香，冷

蕊數枝爭發。

天涯舊恨，試

看幾許消魂？

長亭門外山重

疊。不盡眼中

青，是愁來時

節。情切，畫

樓深閉，想見  
東風，暗消肌  
雪。孤負枕前  
雲雨，尊前花  
月。心期切處，  
更有多少淒涼，  
殷勤留與歸時

說。 劉得再相  
逢，恰經年離  
別。

蘭陵王（張元  
幹） 卷珠箔，  
朝雨輕陰乍閣。  
闌干外、煙柳

弄晴，芳草侵  
階映紅藥。東  
風妒花惡，吹  
落梢頭嫩萼。  
屏山掩、沉水  
倦熏，中酒心  
情怯杯勺。尋



思舊京洛，正  
年少疏狂，歌  
笑迷著。障泥  
油壁催梳掠，  
曾馳道同載，  
上林攜手，燈  
夜初過早共約，

又爭信飄泊。

寂寞，念行樂。

甚粉淡衣襟，

音斷弦索。瓊

枝璧月春如昨。

悵別後華表，

那四雙鶴。相

思除是，向醉  
裏、暫忘却。

賀新郎（葉夢  
得） 睡起流鶯  
語，掩蒼苔房  
櫳向晚，亂紅  
無數。吹盡殘

花無人見，惟  
有垂楊自舞。

漸暖霽、初回

輕暑，寶扇重

尋明月影，暗

塵侵、上有乘

鸞女。驚舊恨，

遠如許。江南  
夢斷橫江渚，  
浪黏天、葡萄  
漲綠，半空煙  
雨。無限樓前  
滄波意，誰采  
蘋花寄取？但

悵望、蘭舟容  
與，萬里雲帆  
何時到？送孤  
鴻、目斷千山  
阻。誰爲我，  
唱《金縷》。

虞美人（葉夢  
得）（雨後同  
軫譽、才卿置  
酒來禽花下  
作）

落花已作風前  
舞，又送黃昏

雨。曉來庭院  
半殘紅，惟有  
游絲，千丈裊  
晴空。殷勤花  
下同攜手，更  
盡杯中酒。美  
人不用斂蛾眉，



我亦多情，無  
奈酒闌時。

點絳脣（汪藻）  
新月娟娟，  
夜寒江靜山銜  
斗。起來搔首，  
梅影橫窗瘦。

好箇霜天，閑  
却傳杯手。君  
知否？亂鴉啼  
後，歸興濃如  
酒。

喜遷鶯（劉一  
止）（曉行）

曉光催角，聽  
宿鳥未驚，鄰  
雞先覺。迤邐  
煙村，馬嘶人  
起，殘月尚穿  
林薄。淚痕帶  
霜微凝，酒力

沖寒猶弱。嘆

倦客，悄不禁

重染，風塵京

洛。追念人別

後，心事萬重，

難覓孤鴻托。

翠幌嬌深，曲

屏香暖，爭念  
歲華飄泊。怨  
月恨花煩惱，  
不是不曾經著。

者情味、望一  
成消滅，新來  
還惡。

高陽臺（韓  
翥）（除夜）

頻聽銀箭，重  
燃絳蠟，年華  
裊裊驚心。錢  
舊迎新，能消  
幾刻光陰？老

來可慣通宵飲？

待不眠、還怕  
寒侵。掩清樽、  
多謝梅花，伴  
我微吟。鄰娃  
已試春妝了，  
更蜂腰簇翠，

燕股橫金。句  
引東風，也知  
芳思難禁。朱  
顏那有年年好，  
逞艷游、羸取  
如今。恁登臨、



殘雪樓臺，遲  
日園林。

漢宮春（李  
邴） 瀟灑江梅，  
向竹梢疏處，  
橫兩三枝。東  
君也不愛惜，

雪壓霜欺。無  
情燕子，怕春  
寒、輕失花期。

却是有、年年  
塞雁，歸來曾  
見開時。清淺  
小溪如練，問

玉堂何似，茅  
舍疏籬？傷心  
故人去後，冷  
落新詩。微雲  
淡月，對江天、  
分付他誰。空  
自憶、清香未

減，風流不在  
人知。

臨江仙（陳與  
義） 高詠《楚  
詞》 酬午日，  
天涯節序匆匆。  
榴花不似舞裙

紅，無人知此  
意，歌罷滿簾  
風。萬事一身  
傷老矣，戎葵  
凝笑牆東。酒  
杯深淺去年同，

試澆橋下水，  
今夕到湘中。

臨江仙（陳與  
義）（夜登小  
閣憶洛中舊  
游）

憶昔午橋橋上  
飲，坐中多是  
豪英。長溝流  
月去無聲，杏  
花疏影裏，吹  
笛到天明。二  
十餘年如一夢，

此身雖在堪驚。

閑登小閣看新  
晴，古今多少  
事，漁唱起三  
更。

蘇武慢（蔡

伸） 雁落平沙，



煙籠寒水，古  
壘鳴笳聲斷。

青山隱隱，敗  
葉蕭蕭，天際

暝鴉零亂。樓

上黃昏，片帆

千里歸程，年

華將晚。望碧  
雲空暮，佳人  
何處，夢魂俱  
遠。憶舊游、  
邃館朱扉，小  
園香徑，尚想  
桃花人面。書

盈錦軸，恨滿  
金徽，難寫寸  
心幽怨。兩地  
離愁，一樽芳  
酒淒涼，危闌  
倚遍。盡遲留、

憑仗西風，吹  
乾淚眼。

柳梢青（蔡  
伸） 數聲鶯畎，  
可憐又是、春  
歸時節。滿院  
東風，海棠鋪

繡，梨花飄雪。

丁香露泣殘枝，  
算未比、愁腸  
寸結，自是休  
文，多情多感，  
不干風月。

鷓鴣天（周紫  
芝） 一點殘釭

欲盡時，乍涼

秋氣滿屏幃。

梧桐葉上三更

雨，葉葉聲聲

是別離。調寶

瑟，撥金猊，  
那時同唱《鷓鴣  
詞》。如今  
風雨西樓夜，  
不聽清歌也淚  
垂。

踏莎行（周紫  
芝） 情似游絲，  
人如飛絮，淚  
珠閣定空相覷。

一溪煙柳萬絲  
垂，無因繫得  
蘭舟住。雁過



斜陽，草迷煙  
渚，如今已是  
愁無數。明朝  
且做莫思量，  
如何過得今宵  
去！

帝臺春（李  
甲） 芳草碧色，  
萋萋遍南陌。  
暖絮亂紅，也  
似知人，春愁  
無力。憶得盈  
盈拾翠侶，共

攜賞、鳳城寒  
食。到今來，  
海角逢春，天  
涯爲客。愁旋  
釋、還似織；  
淚暗拭，又偷  
滴。漫倚遍危

闌，盡黃昏也，  
只是暮雲凝碧。

拚則而今已拚  
了，忘則怎生  
便忘得。又還  
問鱗鴻，試重  
尋消息。

憶王孫（李  
甲） 萋萋芳草

憶王孫，柳外  
樓高空斷魂，  
杜宇聲聲不忍  
聞。 欲黃昏，

雨打梨花深閉  
門。

三臺（萬俟  
詠）（清明應  
制）

見梨花初帶夜  
月，海棠半含

朝雨。內苑春、  
不禁過青門，  
御溝漲、潛通  
南浦。東風靜，  
細柳垂金縷，  
望鳳闕非煙非  
霧。好時代、

朝野多歡，遍  
九陌、太平簫  
鼓。乍鶯兒百  
轉斷續，燕子  
飛來飛去。近  
綠水、臺榭映  
鞦韆，鬥草聚、



雙雙游女。 錫  
香更、酒冷踏  
青路，會暗識、  
夭桃朱戶。 向  
晚驟、寶馬雕  
鞍，醉襟惹、  
亂花飛絮。 正

輕寒輕暖漏永，  
半陰半晴雲暮。

禁火天、已是  
試新妝，歲華  
到、三分佳處。

清明看、漢蠟  
傳宮炬，散翠

煙、飛入槐府。

斂兵衛、閤闔  
門開，住傳宣、  
又還休務。

二郎神（徐  
伸） 悶來彈鵲，  
又攪碎、一簾

花影。漫試著  
春衫，還思纖  
手，燠徹金猊  
燼冷。動是愁  
端如何向？但  
怪得新來多病。  
嗟舊日沈腰，

如今潘鬢，怎  
堪臨鏡？重省，  
別時淚濕，羅  
衣猶凝，料爲  
我厭厭，日高  
慵起，長托春  
醒未醒。雁足

不來，馬蹄難  
駐，門掩一庭  
芳景。空佇立，  
盡日闌干，倚  
遍畫長人靜。

江神子慢（田  
爲）玉臺掛秋

月，鉛素淺、  
梅花傳香雪。  
冰姿潔，金蓮  
襯、小小凌波  
羅襪。雨初歇，  
樓外孤鴻聲漸  
遠，遠山外、

行人音信絕。

此恨對語猶難，  
那堪更寄書說。

教人紅消翠減，  
覺衣寬金縷，  
都爲輕別。太  
情切。消魂處、



畫角黃昏時節。

聲嗚咽。落

盡庭花春去也，

銀蟾迴、無情

圓又缺。恨伊

不似餘香，惹

鴛鴦結。

驀山溪梅（曹  
組） 洗妝真態，  
不作鉛華御。  
竹外一枝斜，  
想佳人天寒日  
暮。 黃昏院落，  
無處著清香，

風細細，雪垂  
垂，何況江頭  
路。月邊疏影，  
夢到消魂處。  
結子欲黃時，  
又須作廉纖細  
雨。孤芳一世，

供斷有情愁，  
消瘦損，東陽  
也，試問花知  
否？

賀新郎（李  
玉）篆縷消金  
鼎，醉沉沉、

庭陰轉午，畫  
堂人靜。芳草  
王孫知何處？  
惟有楊花糝徑。

漸玉枕、騰騰  
春醒，簾外殘  
紅春已透，鎮

無聊、殢酒厭  
厭病。雲鬢亂，  
未忺整。江南  
舊事休重省，  
遍天涯尋消問  
息，斷鴻難倩。

月滿西樓憑欄

久，依舊歸期  
未定。又只恐  
瓶沈金井，嘶  
騎不來銀燭暗，  
枉教人立盡梧  
桐影。誰伴我，  
對鸞鏡。

燭影搖紅（廖  
世美）（題安  
陸浮雲樓）

靄靄春空，畫  
樓森聳凌雲渚。

紫薇登覽最關  
情，絕妙誇能



賦。惆悵相思  
遲暮，記當日、  
朱闌共語。塞  
鴻難問，岸柳  
何窮，別愁紛  
絮。催促年光，  
舊來流水知何

處？斷腸何必  
更殘陽，極目  
傷平楚。晚霽  
波聲帶雨，悄  
無人舟橫野渡。  
數峰江上，芳

草天涯，參差  
煙樹。

薄倖（呂濱  
老） 青樓春晚，  
晝寂寂、梳勻  
又懶。乍聽得、  
鴉啼鶯囀，惹

起新愁無限。

記年時、偷擲

春心，花前隔

霧遙相見。便

角枕題詩，寶

釵貰酒，共醉

青苔深院。怎

忘得、迴廊下，  
攜手處、花明  
月滿。如今但  
暮雨，蜂愁蝶  
恨，小窗閑對  
芭蕉展，却誰  
拘管？盡無言

閑品秦箏，淚  
滿參差雁。腰  
肢漸小，心與  
楊花共遠。

南浦（孔夷）  
風悲畫角，聽  
《單于》、三

弄落譙門。投

宿駸駸征騎，

飛雪滿孤村。

酒市漸闌燈火，

正敲窗、亂葉

舞紛紛。送數

聲驚雁，乍離

煙水，嘹唳度  
寒雲。好在半  
朧淡月，到如今、無處不消  
魂。故國梅花  
歸夢，愁損綠  
羅裙。爲問暗



香閣艷，也相思、萬點付啼痕。  
算翠屏應是，兩眉餘恨  
倚黃昏。

滿江紅（岳飛）  
怒髮衝冠，

憑闌處、簫簫  
雨歇。抬望眼、  
仰天長嘯，壯  
懷激烈。三十  
功名塵與土，  
八千里路雲和  
月。莫等閑、

白了少年頭，  
空悲切。靖康  
恥，猶未雪，  
臣子憾，何時  
滅。駕長車踏  
破、賀蘭山缺。  
壯志饑餐胡虜

肉，笑談渴飲

匈奴血。待從

頭、收拾舊山

河，朝天闕。

燭影搖紅（張

掄）（上元有

懷）

雙闕中天，鳳  
樓十二春寒淺。

去年元夜奉宸  
游，曾侍瑤池  
宴。玉殿珠簾  
盡卷，擁群仙、  
蓬壺閬苑。五

雲深處，萬燭  
光中，揭天絲  
管。馳隙流年，  
恍如一瞬星霜  
換。今宵誰念  
泣孤臣，回首  
長安遠。可是

塵緣未斷，漫  
惆悵、華胥夢  
短。滿懷幽恨，  
數點寒燈，幾  
聲歸雁。

水龍吟（程  
垓）夜來風雨

匆匆，故園定  
是花無幾。愁  
多怨極，等閑  
孤負，一年芳  
意。柳困桃慵，  
杏青梅小，對  
人容易。算好



春長在，好花  
長見，原只是、  
人憔悴。回首  
池南舊事，恨  
星星、不堪重  
記。如今但有，  
看花老眼，傷

時清淚。不怕  
逢花瘦，只愁  
怕、老來風味。

待繁紅亂處，  
留雲借月，也  
須拚醉。

六州歌頭（張  
孝祥） 長淮望  
斷，闕塞莽然  
平。征塵暗，  
霜風勁，悄邊  
聲。黯消凝，  
追想當年事，

殆天數，非人  
力，洙泗上，  
弦歌地，亦臙  
臙。 隔水氈鄉，  
落日牛羊下，  
區脫縱橫。 看  
名王宵獵，騎

火一川明，笳  
鼓悲鳴，遣人  
驚。念腰間箭，  
匣中劍，空埃  
壘，竟何成！  
時易失，心徒  
壯，歲將零，

渺神京。干羽

方懷遠，靜烽

燧，且休兵。

冠蓋使，紛馳

驚，若爲情。

聞道中原遺老，

常南望，翠葆

霓旌。使行人  
到此，忠憤氣  
填膺，有淚如  
傾。

念奴嬌（張孝  
祥） 洞庭青草，  
近中秋、更無

一點風色。玉  
界瓊田三萬頃，  
著我扁舟一葉。

素月分輝，銀  
河共影，表裏  
俱澄澈。怡然  
心會，妙處難



與君說。應念  
嶺海經年，孤  
光自照，肝膽  
皆冰雪。短髮  
蕭騷襟袖冷，  
穩泛滄浪空闊。  
盡挹西江，細

斟北斗，萬象  
爲賓客。扣舷  
獨嘯，不知今  
夕何夕。

六州歌頭（韓  
元吉）東風著  
意，先上小桃

枝。紅粉膩，  
嬌如醉，倚朱  
扉。記年時，  
隱映新妝面，  
臨水岸，春將  
半，雲日暖，  
斜橋轉，夾城

西。草軟莎平。

跋馬垂楊渡，

玉勒爭嘶。認

蛾眉，凝笑臉，

薄拂燕脂，繡

戶曾窺，恨依

依。共攜手處，

香如霧，紅隨  
步，怨春遲。

消瘦損，憑誰

問？只花知，

淚空垂。舊日

堂前燕，和煙

雨，又雙飛。

人自老，春長  
好，夢佳期。

前度劉郎，幾  
許風流地，花  
也應悲。但茫  
茫暮靄，目斷

武陵溪，往事  
難追。

好事近（韓元  
吉） 凝碧舊池  
頭，一聽管弦  
淒切。多少梨  
園聲在，總不

堪華髮。杏花

無處避春愁，

也傍野煙發。

惟有御溝聲斷，

似知人嗚咽。

瑞鶴仙（袁去

華） 郊原初過



雨，見數葉零  
亂，風定猶舞。

斜陽掛深樹，  
映濃愁淺黛，  
遙山媚嫵。來  
時舊路，尚岩  
花、嬌黃半吐。

到而今惟有、  
溪邊流水，見  
人如故。無語，  
郵亭深靜，下  
馬還尋，舊曾  
題處。無聊倦  
旅，傷離恨，

最愁苦。縱收  
香藏鏡，他年  
重到，人面桃  
花在否？念沉  
沉小閣幽窗，  
有時夢去。

劍器近（袁去  
華） 夜來雨，  
賴倩得東風吹  
住。海棠正妖  
嬈處，且留取。

悄庭戶，試細  
聽鶯啼燕語，

分明共人愁緒，  
怕春去。佳樹，  
翠陰初轉午。  
重簾未卷，乍  
睡起，寂寞看  
風絮。偷彈清  
淚寄煙波，見

江頭故人，爲  
言憔悴如許。  
彩箋無數，去  
却寒暄，到了  
渾無定據。斷  
腸落日千山暮。

安公子（袁去  
華） 弱柳千絲  
縷，嫩黃勻遍  
鴉啼處。寒入  
羅衣春尚淺，  
過一番風雨。  
問燕子來時，

綠水橋邊路，  
曾畫樓、見箇  
人人否？料靜  
掩雲窗，塵滿  
哀弦危柱。庾  
信愁如許，爲  
誰都著眉端聚。



獨立東風彈淚  
眼，寄煙波東  
去。念永晝春  
閑，人倦如何  
度？閑傍枕、  
百轉黃鸝語。

喚覺來厭厭，  
殘照依然花塢。

瑞鶴仙（陸  
淞） 臉霞紅印

枕，睡覺來、  
冠兒還是不整。

屏閒麝煤冷，

但眉峰壓翠，  
淚珠彈粉。堂  
深晝永，燕交  
飛、風簾露井。

恨無人說與，  
相思近日，帶  
圍寬盡。重省，

殘燈朱幌，淡  
月紗窗，那時  
風景。陽臺路  
回，雲雨夢，  
便無準。待歸  
來，先指花梢  
教看，却把心

期細問。問因  
循過了青春，  
怎生意穩。

卜算子（陸  
游）（詠梅）

驛外斷橋邊，  
寂寞開無主。

已是黃昏獨自  
愁，更著風和  
雨。無意苦爭  
春，一任群芳  
妒。零落成泥  
碾作塵，只有  
香如故。

水龍吟（陳  
亮） 鬧花深處  
樓臺，畫簾半  
卷東風軟。春  
歸翠陌，平莎  
茸嫩，垂楊金  
淺。遲日催花，

淡雲閣雨，輕  
寒輕暖。恨芳  
菲世界，遊人  
未賞，都付與  
鶯和燕。寂寞  
憑高念遠，向  
南樓、一聲歸



雁。金釵鬥草，  
青絲勒馬，風  
流雲散。羅綬  
分香，翠綃封  
淚，幾多幽怨？  
正消魂又是，

疏煙淡月，子  
規聲斷。

憶秦娥（范成  
大） 樓陰缺，  
闌干影臥東廂  
月。東廂月，  
一天風露，杏

花如雪。隔煙  
催漏金蛩咽，  
羅幃黯淡燈花  
結。燈花結，  
片時春夢，江  
南天闊。

眼兒媚（范成大）  
（萍鄉道中  
乍晴，臥輿  
中困甚，小憩  
柳塘。）

酣酣日腳紫煙  
浮，妍暖破輕

裘。困人天色，  
醉人花氣，午  
夢扶頭。春慵  
恰似春塘水，  
一片縠紋愁。  
溶溶曳曳，東

風無力，欲避  
還休。

霜天曉角（范  
成大） 晚晴風  
歇，一夜春威  
折。脈脈花疏  
天淡，雲來去，

數枝雪。勝絕，  
愁亦絕，此情  
誰共說。惟有  
兩行低雁，知  
人倚畫樓月。

賀新郎（辛棄疾）  
（別茂嘉十二弟）

綠樹聽鶉鴂，  
更那堪、鶼鶼  
聲住，杜鵑聲  
切。啼到春歸



無啼處，苦恨  
芳菲都歇。算  
未抵人間離別，  
馬上琵琶關塞  
黑，更長門、  
翠輦辭金闕，  
看燕燕，送歸

妾。將軍百戰  
身名裂，向河  
梁、回頭萬里。

故人長絕。

易水蕭蕭西風  
冷，滿座衣冠  
似雪。正壯士、

悲歌未徹。啼  
鳥還知如許恨，  
料不啼、清淚  
長啼血，誰共  
我，醉明月？

念奴嬌（辛棄疾）  
（書東流村壁）

野塘花落，又  
匆匆過了清明  
時節。劃地東  
風欺客夢，一

枕雲屏寒怯。

曲岸持觴，垂

楊繫馬，此地

曾經別。樓空

人去，舊游飛

燕能說。聞道

綺陌東頭，行

人曾見，簾底  
纖纖月。舊恨  
春江流不盡，  
新恨雲山千疊。

料得明朝，樽  
前重見，鏡裏  
花難折。也應

驚問，近來多  
少華髮？

漢宮春（辛棄  
疾）（立春）

春已歸來，看  
美人頭上，裊  
裊春幡。無端

風雨，未肯收  
盡餘寒。年時  
燕子，料今宵  
夢到西園。渾  
未辨、黃柑薦  
酒，更傳青韭  
堆盤。却笑東



風，從此便薰  
梅染柳，更沒  
些閑。閑時又  
來鏡裏，轉變  
朱顏。清愁不  
斷，問何人會  
解連環。生怕

見花開花落，  
朝來塞雁先還。

賀新郎（辛棄  
疾）（賦琵琶）

鳳尾龍香撥，  
自開元《霓裳

曲》罷，幾番  
風月。最苦潯  
陽江頭客，畫  
舸亭亭待發。  
記出塞、黃雲  
堆雪。馬上離  
愁三萬里，望

昭陽、宮殿孤  
鴻沒，弦解語，  
恨難說。遼陽  
驛使音塵絕，  
瑣窗寒、輕攏  
慢拈，淚珠盈  
睫。推手含情

還却手，一抹

《梁州》哀徹。

千古事、雲飛

煙滅。賀老定

場無消息，想

沉香亭北繁華

歇，彈到此，  
爲嗚咽。

水龍吟（辛棄  
疾）（登建康  
賞心亭）

楚天千里清秋，  
水隨天去秋無

際。遙岑遠目，  
獻愁供恨，玉  
簪螺髻。落日  
樓頭，斷鴻聲  
裏，江南遊子，  
把吳鉤看了，  
欄干拍遍，無

人會、登臨意。

休說鱸魚堪膾，  
盡西風季鷹歸  
未？求田問舍，  
怕應羞見，劉  
郎才氣。可惜  
流年，憂愁風



雨，樹猶如此。

倩何人喚取，

紅巾翠袖。搵

英雄淚？

摸魚兒（辛棄

疾）（淳熙己

亥，自湖北漕

移湖南，同官  
王正之置酒小  
山亭，爲賦）

更能消幾番風  
雨，匆匆春又  
歸去。惜春長  
怕花開早。何

況落紅無數。

春且住！見說

道、天涯芳草

無歸路。怨春

不語，算只有

殷勤，畫檐珠

網，盡日惹飛

絮。長門事，  
準擬佳期又誤，  
蛾眉曾有人妒。

千金縱買相如  
賦，脈脈此情  
誰訴？君莫舞！  
君不見、玉環

飛燕皆塵土。

閑愁最苦。休

去倚危闌，斜

陽正在，煙柳

斷腸處。

永遇樂（辛棄疾）  
（京口北固亭懷古）

千古江山，英雄無覓、孫仲謀處。舞榭歌臺，風流總被、

雨打風吹去。

斜陽草樹，尋

常巷陌，人道

寄奴曾住。想

當年，金戈鐵

馬，氣吞萬里

如虎。元嘉草

草，封狼居胥，  
贏得倉皇北顧。

四十三年，望  
中猶記、燈火  
揚州路。可堪  
回首，佛狸祠  
下，一片神鴉



社鼓。憑誰問，

廉頗老矣，尚

能飯否？

木蘭花慢（辛

棄疾）（滁州

送范倅）

老來情味減，  
對別酒，怯流  
年。況屈指中  
秋，十分好月，  
不照人圓。無  
情水都不管，  
共西風、只管

送歸船。 秋晚

蓴鱸江上，夜

深兒女燈前。

征衫，便好去

朝天，玉殿正

思賢。 想夜半

承明，留教視

草，却遣籌邊。

長安，故人問

我，道愁腸殢

酒只依然。目

斷秋霄落雁，

醉來時響空弦。

祝英臺近（辛  
棄疾） 寶釵分，  
桃葉渡，煙柳  
暗南浦。怕上  
層樓，十日九  
風雨。斷腸片  
片飛紅，都無

人管，更誰勸  
啼鶯聲住？鬢  
邊覷，應把花  
卜歸期，才簪  
又重數。羅帳  
燈昏，嗔咽夢  
中語。是他春

帶愁來，春歸  
何處？却不解  
帶將愁去。

青玉案（辛棄  
疾） 元夕

東風夜放花千  
樹，更吹落、

星如雨。寶馬

雕車香滿路，

鳳簫聲動，玉

壺光轉，一夜

魚龍舞。

蛾兒雪柳黃金

縷，笑語盈盈



暗香去。衆裡  
尋他千百度；  
驀然回首，那  
人却在、燈火  
闌珊處。

鷓鴣天（辛棄  
疾）（鵝湖歸  
病起作）

枕簟溪堂冷欲  
秋，斷雲依水  
晚來收。紅蓮  
相倚渾如醉，

白鳥無言定自  
愁。書咄咄，  
且休休，一丘  
一壑也風流。  
不知筋力衰多  
少，但覺新來  
懶上樓。

菩薩蠻（辛棄疾）  
（書江西造口壁）

鬱孤臺下清江水，  
中間多少行人淚。  
西北是長安，可憐

無數山。青山

遮不住，畢竟

江流去。江晚

正愁余，山深

聞鷓鴣。

點絳脣（姜夔）  
（丁未冬，過吳松作。）

燕雁無心，太湖西畔隨雲去。

數峰清苦，商略黃昏雨。第

四橋邊，擬共  
天隨住。今何  
許？憑欄懷古，  
殘柳參差舞。

鷓鴣天（姜  
夔）（元夕有  
所夢）

肥水東流無盡  
期，當初不合  
種相思。夢中  
未比丹青見，  
暗裏忽驚山鳥  
啼。春未綠，  
鬢先絲，人間



別久不成悲。

誰教歲歲紅蓮

夜，兩處沉吟

各自知。

踏莎行（姜

夔）（自沔東

來。丁未元旦

至金陵，江上  
感夢而作。）

燕燕輕盈，鶯  
鶯嬌軟，分明  
又向華胥見。

夜長爭得薄情  
知？ 春初早被

相思染。別後  
書辭，別時針  
線，離魂暗逐  
郎行遠。淮南  
皓月冷千山，  
冥冥歸去無人  
管。

慶宮春（姜夔）  
（小序略）

雙槳蓴波，一  
蓑松雨，暮愁  
漸滿空闊。呼  
我盟鷗，翩翩

欲下，背人還  
過木末。那回  
歸去，蕩雲雪  
孤舟夜發。傷  
心重見，依約  
眉山，黛痕低  
壓。采香徑裏

春寒，老子婆  
娑，自歌誰答？

垂虹西望，飄  
然引去，此興  
平生難遏。酒  
醒波遠，正凝  
想明璫素襪。

如今安在？惟  
有闌干，伴人  
一霎。

齊天樂（姜  
夔）（小序  
略）

庾郎先自吟愁  
賦，淒淒更聞  
私語。露濕銅  
鋪，苔侵石井，  
都是曾聽伊處。

哀音似訴，正  
思婦無眠，起



尋機杼。曲曲  
屏山，夜涼獨  
自甚情緒？西  
窗又吹暗雨，  
爲誰頻斷續，  
相和砧杵？候  
館迎秋，離宮

吊月，別有傷  
心無數。

《幽》詩漫與，  
笑籬落呼燈，  
世間兒女。寫  
入琴絲，一聲  
聲更苦。

琵琶仙（姜夔）  
（小序略）

雙槳來時，有人似舊曲桃根  
桃葉。歌扇輕  
約飛花，蛾眉

正奇絕。春漸  
遠，汀洲自綠，  
更添了幾聲啼  
鴂。十里揚州，  
三生杜牧，前  
事休說。又還  
是宮燭分煙，

奈愁裏匆匆換  
時節。都把一  
襟芳思，與空  
階榆莢。千萬  
縷、藏鴉細柳，  
爲玉尊、起舞  
回雪。想見西

出陽關，故人  
初別。

八、歸（姜夔）

（湘中送胡德  
華）

芳蓮墜粉，疏  
桐吹綠，庭院

暗雨乍歇。無  
端抱影銷魂處，  
還見篠牆螢暗，  
蘚階蛩切。送  
客重尋西去路，  
問水面、琵琶  
誰撥？最可惜、

一片江山，總  
付與啼鴂。長  
恨相逢未款，  
而今何事，又  
對西風離別？  
渚寒煙淡，棹  
移人遠，飄渺



行舟如葉。想  
文君望久，倚  
竹愁生步羅襪。

歸來後、翠尊  
雙飲，下了珠  
簾，玲瓏閑看  
月。

念奴嬌（姜夔）  
（小序略）

鬧紅一舸，記  
來時嘗與鴛鴦  
爲侶。三十六  
陂人未到，水

佩風裳無數。

翠葉吹涼，玉

容消酒，更灑

荻蒲雨。嫋然

搖動，冷香飛

上詩句。日暮，

青蓋亭亭，情

人不見，爭忍  
凌波去？只恐  
舞衣寒易落，  
愁入西風南浦。

高柳垂陰，老  
魚吹浪，留我  
花間住。田田

多少，幾回沙  
際歸路。

揚州慢（姜  
夔）（小序  
略）

淮左名都，竹  
西佳處，解鞍

少駐初程。過  
春風十里，盡  
蘼麥青青。自  
胡馬窺江去後，  
廢池喬木，猶  
厭言兵。漸黃  
昏，清角吹寒，

都在空城。杜  
郎俊賞，算而  
今、重到須驚。

縱豆蔻詞工，  
青樓夢好，難  
賦深情。二十  
四橋仍在，波

心蕩冷月無聲。

念橋邊紅藥，

年年知爲誰生？

長亭怨慢（姜

夔）（小序

略）



漸吹盡，枝頭  
香絮，是處人  
家，綠深門戶。

遠浦縈回，暮  
帆零亂，向何  
許？ 閱人多矣，  
誰得似長亭樹？

樹若有情時，  
不會得青青如  
此！日暮，望  
高城不見，只  
見亂山無數。  
韋郎去也，怎  
忘得玉環分付。

第一是早早歸  
來，怕紅萼無  
人爲主。算空  
有並刀，難剪  
離愁千縷。

淡黃柳（姜夔）  
（小序略）

空城曉角，吹入垂楊陌。馬上單衣寒惻惻。  
看盡鵝黃嫩綠，

都是江南舊相  
識。正岑寂，  
明朝又寒食。  
強攜酒、小橋  
宅，怕梨花落  
盡成秋色。燕  
燕飛來，問春

何在？ 惟有池  
塘自碧。

暗香（姜夔）

（小序略）

舊時月色，算  
幾番照我，梅  
邊吹笛？ 喚起

玉人，不管清  
寒與攀摘。何  
遜而今漸老，  
都忘却春風詞  
筆。但怪得竹  
外疏花，香冷  
入瑤席。江國，

正寂寂，嘆寄  
與路遙，夜雪  
初積。翠尊易  
泣。紅萼無言  
耿相憶。長記  
曾攜手處，千  
樹壓、西湖寒



碧。又片片、  
吹盡也，幾時  
見得？

疏影（姜夔）

苔枝綴玉，有  
翠禽小小，枝  
上同宿。客裏

相逢，籬角黃  
昏，無言自倚  
修竹。昭君不  
慣胡沙遠，但  
暗憶、江南江  
北。想佩環月  
夜歸來，化作

此花幽獨。猶  
記深宮舊事，  
那人正睡裏，  
飛近蛾綠。莫  
似春風，不管  
盈盈，早與安  
排金屋。還教

一片隨波去，  
又却怨玉龍哀  
曲。等恁時、  
重覓幽香，已  
入小窗橫幅。

翠樓吟（姜夔）  
（小序略）

月冷龍沙，塵清虎落，今年漢  
酺初賜。新胡部曲，聽

氈幕元戎歌吹。

層樓高峙，看  
欄曲縈紅，檐  
牙飛翠。人姝  
麗，粉香吹下，  
夜寒風細。此  
地宜有詞仙，

擁素雲黃鶴，  
與君遊戲。玉  
梯凝望久，但  
芳草萋萋千里。

天涯情味，仗  
酒發清愁，花  
消英氣。西山

外，晚來還卷，  
一簾秋霽。

杏花天（姜  
夔）（小序  
略）

綠絲低拂鴛鴦  
浦，想桃葉，



當時喚渡。又  
將愁眼與春風，  
待去，倚蘭橈  
更少駐。金陵  
路，鶯吟燕舞。

算潮水知人最  
苦。滿汀芳草

不成歸，日暮，  
更移舟向甚處？

一萼紅（姜  
夔）（小序  
略）

古城陰，有官  
梅幾許，紅萼

未宜簪。池面  
冰膠，牆腰雪  
老，雲意還又  
沉沉。翠藤共、  
閑穿徑竹，漸  
笑語、驚起臥  
沙禽。野老林

泉，故王臺榭，  
呼喚登臨。南  
去北來何事，  
蕩湘雲楚水，  
目極傷心。朱  
戶黏雞，金盤  
簇燕，空嘆時

序侵尋。記曾  
共、西樓雅集，  
想垂柳、還嬌  
萬絲金。待得  
歸鞍到時，只  
怕春深。

霓裳中序第一

（姜夔）（小  
序略）

亭皋正望極，  
亂落江蓮歸未  
得。多病卻無  
氣力，況紈扇

漸疏，羅衣初  
索。流光過隙，  
嘆杏梁、雙燕  
如客。人何在？  
一簾淡月，仿  
彿照顏色。幽  
寂，亂蛩吟壁，

動庾信、清愁  
似織。 沉思年  
少浪跡，笛裏  
關山，柳下坊  
陌。 墜紅無信  
息，漫暗水、  
涓涓溜碧。 飄



零久、而今何  
意，醉臥酒壚  
側。

小重山（章良  
能） 柳暗花明  
春事深，小闌  
紅芍藥，已抽

簪。雨餘風軟  
碎鳴禽，遲遲  
日，猶帶一分  
陰。往事莫沉  
吟。身閑時序  
好、且登臨。  
舊游無處不堪

尋，無尋處，  
惟有少年心。

唐多令（劉  
過）（小序  
略）

蘆葉滿汀洲，  
塞沙帶淺流。

二十年重過南  
樓。柳下繫船  
猶未穩，能幾  
日，又中秋。  
黃鶴斷磯頭，  
故人曾到否？  
舊江山渾是新

愁。欲買桂花  
同載酒，終不  
似，少年游。

木蘭花（嚴  
仁）春風只在  
園西畔，薔菜  
花繁蝴蝶亂。

冰池晴綠照還  
空，香徑落紅  
吹已斷。意長

恨游絲短，  
盡日相思羅帶  
緩。寶奩如月

不欺人，明日  
歸來君試看。

風入松（俞國  
寶） 一春長費  
買花錢，日日  
醉湖邊。玉驄  
慣識西湖路，

驕嘶過、沽酒  
樓前。紅杏香  
中簫鼓，綠楊  
影裏鞦韆。暖  
風十里麗人天。

花壓鬢雲偏。  
畫船載取春歸



去，餘情寄湖  
水湖煙。明日  
重扶殘醉，來  
尋陌上花鈿。

滿庭芳（張  
鎡）（促織  
兒）

月洗高梧，露  
漙幽草，寶釵  
樓外秋深。土  
花沿翠，螢火  
墜牆陰。靜聽  
寒聲斷續，微  
韻轉、淒咽悲

沉。爭求侶、  
殷勤勸織，促  
破曉機心。兒  
時曾記得，呼  
燈灌穴，斂步  
隨音。任滿身  
花影，猶自追

尋。攜向華堂  
戲鬥，亭臺小、  
籠巧妝金。今  
休說，從渠床  
下，涼夜伴孤  
吟。

宴山亭（張  
鎡） 幽夢初回，  
重陰未開，曉  
色催成疏雨。  
竹檻氣寒，蕙  
畹聲搖，新綠  
暗通南浦。未

有人行，才半  
啓迴廊朱戶。  
無緒，空望極  
霓旌，錦書難  
據。苔徑追憶  
曾游，念誰伴  
鞦韆，彩繩芳

柱。 犀簾黛卷，  
鳳枕雲孤，應  
也幾番凝佇。  
怎得伊來，花  
霧繞、小堂深  
處。 留住，直  
到老不教歸去。

綺羅香（史達  
祖）（詠春  
雨）

做冷欺花，將  
煙困柳，千里  
偷催春暮。盡  
日冥迷，愁裏



欲飛還住。驚  
粉重、蝶宿西  
園，喜泥潤、  
燕歸南浦。最  
妨他佳約風流，  
鈿車不到杜陵  
路。沉沉江上

望極，還被春  
潮晚急，難尋  
官渡。隱約遙  
峰，和淚謝娘  
眉嫵。臨斷岸、  
新綠生時，是  
落紅、帶愁流

處。記當日門  
掩梨花，翦燈  
深夜語。

雙雙燕（史達  
祖）（詠燕）

過春社了，度  
簾幕中間，去

年塵冷。羞池  
欲住，試入舊  
巢相並。還相  
雕梁藻井，又  
軟語商量不定。

飄然快拂花梢，  
翠尾分開紅影。

芳徑，芹泥雨  
潤，愛貼地爭  
飛，竟夸輕俊。

紅樓歸晚，看  
足柳昏花暝。  
應自棲香正穩，  
便忘了天涯芳

信。愁損翠黛

雙蛾，日日畫

闌獨憑。

東風第一枝

（史達祖）

（春雪）

巧沁蘭心，偷  
黏草甲，東風  
慙障新暖。漫  
疑碧瓦難留，  
信知暮寒猶淺。

行天入鏡，做  
弄出、輕松纖

軟。料故園、  
不捲重簾，誤  
了乍來雙燕。  
青未了、柳回  
白眼。紅欲斷、  
杏開素麵。舊  
游憶著山陰，



後盟遂妨上苑。

寒爐重熨，便  
放漫春衫針線。

怕鳳靴挑菜歸  
來，萬一灞橋  
相見。

喜遷鶯（史達  
祖）月波疑滴，  
望玉壺天近，  
了無塵隔。翠  
眼圈花，冰絲  
織練，黃道寶  
光相直，自憐

詩酒瘦，難應  
接許多春色。  
最無賴，是隨  
香趁燭，曾伴  
狂客。蹤跡，  
漫記憶，老了  
杜郎，忍聽東

風笛。 柳院燈  
疏，梅廳雪在，  
誰與細傾春碧？  
舊情拘未定，  
猶自學當年游  
歷。 怕萬一，

誤玉人夜寒簾  
隙。

三姝媚（史達  
祖） 煙光搖縹  
瓦，望晴檐多  
風，柳花如酒。

錦瑟橫床，想

淚痕塵影，鳳  
弦常下。倦出  
犀帷，頻夢見、  
王孫驕馬。諱  
道相思，偷理  
綃裙，自驚腰  
衩。惆悵南樓

遙夜，記翠箔  
張燈，枕肩歌  
罷。又入銅駝，  
遍舊家門巷，  
首詢聲價。可  
惜東風，將恨  
與閑花俱謝。

記取崔徽模樣，  
歸來暗寫。

秋霽（史達  
祖） 江水蒼蒼，  
望倦柳愁荷，  
共感秋色。廢  
閣先涼，古簾



空暮，雁程最  
嫌風力。故園  
信息，愛渠入  
眼南山碧。念  
上國，誰是膾  
鱸江漢未歸客。

還又歲晚、瘦

骨臨風，夜闌  
秋聲，吹動岑  
寂。露蛩悲、  
青燈冷屋，  
書愁上鬢毛白。

年少俊游渾斷  
得，但可憐處，

無奈冉冉魂驚，  
采香南浦，翦  
梅煙驛。

夜合花（史達  
祖） 柳鎖鶯魂，  
花 蝶夢，自  
知愁染潘郎。

輕衫未攬，猶  
將淚點偷藏。  
念前事，怯流  
光，早春窺、  
酥雨池塘。向  
消凝裏，梅開  
半面，情滿徐

妝。風絲一寸  
柔腸，曾在歌  
邊惹恨，燭底  
縈香。芳機瑞  
錦，如何未織  
鴛鴦。人扶醉，  
月依牆。是當

初、誰敢疏狂！

把閑言語，花  
房夜久，各自  
思量。

玉蝴蝶（史達  
祖） 晚雨未摧  
宮樹，可憐閑

葉，猶抱涼蟬。

短景歸秋，吟

思又接愁邊。

漏初長、夢魂

難禁，人漸老、

風月俱寒。想

幽歡土花庭甃，

蟲網闌干。無  
端啼蛄攪夜，  
恨隨團扇，苦  
近秋蓮。一笛  
當樓，謝娘懸  
淚立風前。故  
園晚、強留詩



酒，新雁遠、  
不致寒暄。隔  
蒼煙、楚香羅  
袖，誰伴嬋娟。

八歸（史達  
祖） 秋江帶雨，  
寒沙縈水，人

瞰畫閣愁獨。  
煙蓑散響驚詩  
思，還被亂鷗  
飛去，秀句難  
續。冷眼盡歸  
圖畫上，認隔  
岸、微茫雲屋。

想半屬、漁市  
樵村，欲暮竟  
燃竹。須信風  
流未老，憑持  
尊酒，慰此淒  
涼心目。一鞭  
南陌，幾篙官

渡，賴有歌眉  
舒綠。只匆匆  
殘照，早覺閑  
愁掛喬木。應  
難奈故人天際，  
望徹淮山，相  
思無雁足。

生查子（劉克莊）  
（元夕戲陳敬叟）

繁燈奪霽華，  
戲鼓侵明發。  
物色舊時同，  
情味中年別。

淺畫鏡中眉，

深拜樓中月。

人散市聲收，

漸入愁時節。

賀新郎（劉克

莊）（端午）

深院榴花吐，  
畫簾開、練衣  
紈扇，午風清  
暑。兒女紛紛  
夸結束，新樣  
釵符艾虎。早  
已有遊人觀渡。

老大逢場慵作  
戲，任陌頭、  
年少爭旗鼓，  
溪雨急，浪花  
舞。靈均標致  
高如許，憶生  
平既纫蘭佩，



更懷椒醕。誰  
信騷魂千載後，  
波底垂涎角黍。

又說是蛟饞龍  
怒。把似而今  
醒到了，料當  
年、醉死差無

苦，聊一笑，  
吊千古。

賀新郎（劉克  
莊）（九日）

湛湛長空黑，  
更那堪、斜風  
細雨，亂愁如

織。老眼平生  
空四海，賴有  
高樓百尺。看  
浩蕩、千崖秋  
色。白髮書生  
神州淚，盡淒  
涼不向牛山滴。

追往事，去無  
跡。少年自負  
凌雲筆，到而  
今春華落盡，  
滿懷蕭瑟。常  
恨世人新意少，  
愛說南朝狂客。

把破帽年年拈  
出。若對黃花  
孤負酒，怕黃  
花也笑人岑寂。

鴻北去，日西  
匿。

木蘭花（劉克  
莊）（戲林  
推）

年年躍馬長安  
市，客舍似家  
家似寄。青錢  
換酒日無何，

紅燭呼盧宵不  
寐。易挑錦婦  
機中字，難得  
玉人心下事。  
男兒西北有神  
州，莫滴水西  
橋畔淚。

江城子（盧祖  
皋） 畫樓簾幕

卷新晴，掩銀  
屏，曉寒輕。

墜粉飄香，日

日喚愁生。暗

數十年湖上路，



能幾度、著娉  
婷。年華空自  
感飄零，擁春  
醒，對誰醒？  
天闊雲閑，無  
處覓簫聲。載  
酒買花年少事，

渾不似、舊心  
情。

宴清都（盧祖  
皋） 春訊飛瓊  
管，風日薄，  
度牆啼鳥聲亂。

江城次第，笙

歌翠合，綺羅  
香暖。溶溶潤  
淥冰泮，醉夢  
裏，年華暗換。

料黛眉，重鎖  
隋堤，芳心還  
動梁苑。新來

雁闊雲音，鸞  
分鑒影，無計  
重見。春啼細  
雨，籠愁淡月，  
恁時庭院。離  
腸未語先斷，  
算猶有憑高望

眼。更那堪衰  
草連天，飛梅  
弄晚。

南鄉子（潘  
牂）（題南劍  
州妓館）

生怕倚闌干，  
閣下溪聲閣外  
山。惟有舊時  
山共水，依然，  
暮雨朝雲去不  
還。應是躡飛  
鸞，月下時時

整佩環。月又  
漸低霜又下，  
更闌，折得梅  
花獨自看。

瑞鶴仙（陸  
叡） 濕雲黏雁  
影，望征路，

愁迷離緒難整。

千金買光景，

但疏鐘催曉，

亂鴉啼暝。花

悵暗省，許多

情，相逢夢境。

便行雲都不歸



來，也合寄將  
音信。孤回，  
盟鸞心在，跨  
鶴程高，後期  
無準。情絲待  
翦，惹得舊  
時恨。怕天教

何處，參差雙  
燕，還染殘朱  
剩粉。對菱花  
與說相思，看  
誰瘦損？

渡江雲（吳文  
英）（西湖清  
明）

羞紅鬢淺恨，  
晚風未落，片  
繡點重茵。舊  
堤分燕尾，桂

棹輕鷗，寶勒  
倚殘雲。千絲  
怨碧，漸路入  
仙塢迷津。腸  
漫回，隔花時  
見、背面楚腰  
身。逡巡，題

門惆悵，墮履  
牽縈，數幽期  
難準，還始覺  
留情緣眼，寬  
帶因春。明朝  
事與孤煙冷，  
做滿湖風雨愁

人。山黛暝，  
塵波澹綠無痕。

夜合花（吳文  
英）（白鶴江

入京，泊葑門，  
有感）

柳暝河橋，鶯  
清臺苑，短策  
頻惹春香。當  
時夜泊，溫柔  
便入深鄉。詞  
韻窄，酒杯長。

翦蠟花、壺箭

催忙。共追游  
處，凌波翠陌，  
連棹橫塘。十  
年一夢淒涼，  
似西湖燕去，  
吳館巢荒。重  
來萬感，依前



喚酒銀罍。溪  
雨急，岸花狂，  
趁殘鴉飛過蒼  
茫。故人樓上，  
憑誰指與，芳  
草斜陽？

霜葉飛（吳文  
英）（重九）

斷煙離緒，闌  
心事，斜陽紅  
隱霜樹。半壺  
秋水薦黃花，  
香噀西風雨。

縱玉勒、輕飛  
迅羽，淒涼誰  
吊荒臺古。記  
醉踏南屏，彩  
扇咽寒蟬，倦  
夢不知蠻素。  
聊對舊節傳杯，

塵箋蠹管，斷

關經歲慵賦。

小蟾斜影轉東

籬，夜冷殘蛩

語。早白髮、

綠愁萬縷，驚

顰從卷烏紗去，

漫細將、茱萸  
看，但約明年，  
翠微高處。

宴清都（吳文  
英）（連理海  
棠）

繡幄鴛鴦柱，  
紅情密、膩雲  
低護秦樹。芳  
根兼倚，花梢  
鈿合，錦屏人  
妒。東風睡足  
交枝，正夢枕

瑤釵燕股。障

濃蠟、滿照歡

叢，釵蟾冷落

羞度。人間萬

感幽單，華清

慣浴，春盡風

露。連鬟並暖，

同心共結，向  
承恩處。憑誰  
爲歌《長恨》？

暗殿鎖、秋燈  
夜語。敘舊期、  
不負春盟，紅  
朝翠暮。



齊天樂（吳文  
英） 煙波桃葉  
西陵路，十年  
斷魂潮尾。古  
柳重攀，輕鷗  
聚別，陳跡危  
亭獨倚。涼颼

乍起，渺煙磧  
飛帆，暮山橫  
翠。但有江花，  
共臨秋鏡照憔  
悴。華堂燭暗  
送客，眼波回  
盼處，芳艷流

水。素骨凝冰，

柔蔥蘸雪，猶

憶分瓜深意。

清樽未洗，夢

不濕行雲，漫

沾殘淚。可惜

秋宵，亂蛩疏  
雨裏。

花犯（吳文  
英）（郭希道  
送水仙索賦）

小娉婷清鉛素  
靨，蜂黃暗偷

暈。翠 欹鬢。

昨夜冷中庭，  
月下相認，睡  
濃更苦淒風緊。

驚回心未穩。

送曉色、一壺  
蔥蒨，才知花

夢準。湘娥化  
作此幽芳，凌  
波路，古岸雲  
沙遺恨。臨砌  
影，寒香亂、  
凍梅藏韻。熏  
爐畔、旋移傍

枕，還又見、  
玉人垂紺鬢。  
料喚賞、清華  
池館，臺杯須  
滿引。

浣溪沙（吳文  
英） 門隔花深

舊夢游，夕陽  
無語燕歸愁，  
玉纖香動小簾  
鉤。落絮無聲  
春墮淚，行雲  
有影月含羞，



東風臨夜冷於  
秋。

浣溪沙（吳文  
英） 波面銅花  
冷不收，玉人  
垂釣理纖鉤，  
月明池閣夜來

秋。江燕話歸

成曉別，水花

紅減似春休，

西風梧井葉先

愁。

點絳脣（吳文  
英）（試燈夜  
初晴）

卷盡愁雲，素  
娥臨夜新梳洗。

暗塵不起，酥  
潤凌波地。輦

路重來，彷彿  
燈前事。情如  
水，小樓熏被，  
春夢笙歌裏。

祝英臺近（吳  
文英）（春日

客龜溪游廢  
園)

采幽香，巡古  
苑，竹冷翠微  
路。鬥草溪根，  
沙印小蓮步。  
自憐兩鬢清霜，

一年寒食，又  
身在雲山深處。

晝閑度，因甚  
天也慳春，輕  
陰便成雨？綠  
暗長亭，歸夢  
趁風絮。有情

花影闌干，鶯  
聲門徑，解留  
我霎時凝佇。

祝英臺近（吳  
文英）（除夜  
立春）

剪紅情，裁綠  
意，花信上釵  
股。殘日東風，  
不放歲華去。  
有人添燭西窗，  
不眠侵曉，笑  
聲轉新年鶯語。



舊樽俎，玉纖  
曾擘黃柑，柔  
香繫幽素。歸  
夢湖邊，還迷  
鏡中路。可憐  
千點吳霜，寒

消不盡，又相  
對落梅如雨。

澡蘭香（吳文  
英）（淮安重  
午）

盤絲繫腕，巧  
篆垂簪，玉隱

紺紗睡覺。銀  
瓶露井，彩簾  
雲窗，往事少  
年依約。爲當  
時曾寫榴裙，  
傷心紅綃褪萼。  
黍夢光陰，漸

老汀洲煙蕩。

莫唱江南古調，

怨抑難招，楚

江沉魄。薰風

燕乳，暗雨槐

黃，午鏡澡蘭

簾幕。念秦樓、

也擬人歸，應

翦菖蒲自酌。

但悵望一縷新

蟾，隨人天角。

風入松（吳文

英）聽風聽雨

過清明，愁草

瘞花銘。樓前

綠暗分攜路，

一絲柳、一寸

柔情。料峭春

寒中酒，交加

曉夢啼鶯。西

園日日掃林亭，

依舊賞新晴。

黃蜂頻撲鞦韆

索，有當時纖

手香凝。惆悵

雙鴛不到，幽

階一夜苔生。

鶯啼序（吳文  
英）（春晚感  
懷）

殘寒正欺病酒，  
掩沉香繡戶。  
燕來晚、飛入  
西城，似說春



事遲暮。畫船  
載、清明過却，  
晴煙冉冉吳宮  
樹。念羈情、  
游蕩隨風，化  
爲輕絮。十載  
西湖，傍柳繫

馬，趁嬌塵軟  
霧。 遡紅漸招  
入仙溪，錦兒  
偷寄幽素。 倚  
銀屏、春寬夢  
窄，斷紅濕、  
歌紈金縷。 暝

堤空，輕把斜  
陽，總還鷗鷺。

幽蘭旋老，杜  
若還生，水鄉  
尚寄旅。別後  
訪、六橋無信，  
事往花萎，瘞

玉埋香，幾番  
風雨。長波妒  
盼，遙山羞黛，  
漁燈分影春江  
宿，記當時、  
短楫桃根渡，  
青樓彷彿。臨

分敗壁題詩，  
淚墨慘澹塵土。

危亭望極，草  
色天涯，嘆鬢  
侵半萼。暗點  
檢、離痕歡唾，  
尚染鮫綃，顰

鳳迷歸，破鸞  
慵舞。殷勤待  
寫，書中長恨，  
藍霞遼海沉過  
雁，漫相思、  
彈入哀箏柱。  
傷心千里江南，

怨曲重招，斷  
魂在否？

惜黃花慢（吳  
文英）（小序  
略）

送客吳皋，正  
試霜夜冷，楓

落長橋。望天  
不盡，背城漸  
杳，離亭黯黯，  
恨水迢迢。翠  
香零落紅衣老，  
暮愁鎖、殘柳  
眉梢。念瘦腰、



沈郎舊日，曾  
繫蘭橈。仙人  
鳳咽瓊簫。悵  
斷魂送遠，

《九辯》難招。

醉鬟留盼，小  
窗翦燭，歌雲

載恨，飛上銀  
霄。素秋不解  
隨船去，敗紅  
趁一葉寒濤。  
夢翠，怨鴻  
料過南譙。

高陽臺（吳文  
英） 宮粉雕痕，  
仙雲墮影，無  
人野水荒灣。  
古石埋香，金  
沙鎖骨連環。  
南樓不恨吹橫

笛，恨曉風千  
里關山。半飄  
零、庭上黃昏，  
月冷闌干。壽  
陽空理愁鸞，  
問誰調玉髓，  
暗補香瘢？細

雨歸鴻，孤山  
無限春寒。離  
魂難倩招清些，  
夢縞衣解佩溪  
邊。最愁人、  
啼鳥晴明，葉  
底清圓。

高陽臺（吳文  
英）（豐樂樓  
分韻得如字）

修竹凝妝，垂  
楊駐馬，憑闌  
淺畫成圖。山  
色誰題？樓前

有雁斜書。東  
風緊送斜陽下，  
弄舊寒、晚酒  
醒餘。自消凝，  
能幾花前，頓  
老相如？傷春  
不在高樓上，

在燈前欹枕，  
雨外熏爐。怕  
樣遊船，臨流  
可奈清臞？飛  
紅若到西湖底，  
攪翠瀾、總是  
愁魚。莫重來、



吹盡香綿，淚  
滿平蕪。

三姝媚（吳文  
英）（過都城  
舊居有感）

湖山經醉慣，  
漬春衫，啼痕

酒痕無限。又  
客長安，嘆斷  
襟零袂，灑塵  
誰浣。紫曲門  
荒，沿敗井、  
風搖青蔓。對  
語東鄰，猶是

曾巢，謝堂雙  
燕。春夢人間  
須斷，但怪得  
當年，夢緣能  
短。繡屋秦箏，  
傍海棠偏愛，  
夜深開宴。舞

歇歌沉，花未  
減、紅顏先變。

佇久河橋欲去，  
斜陽淚滿。

八聲甘州（吳  
文英）（靈岩

陪庾幕諸公  
游)

渺空煙四遠，  
是何年、青天  
墜長星。 幻蒼  
崖雲樹，名娃  
金屋，殘霸宮

城。箭徑，酸  
風射眼，膩水  
染花腥。時鞞  
雙鴛響，廊葉  
秋聲。宮裏吳  
王沉醉，倩五  
湖倦客，獨釣

醒醒。問蒼波  
無語，華髮奈  
山青。水涵空、  
闌干高處，送  
亂鴉、斜日落  
漁汀。連呼酒，

上琴臺去，秋  
與雲平。

踏莎行（吳文  
英） 潤玉籠綃，  
檀櫻倚扇，繡  
圈猶帶脂香淺。

榴心空疊舞裙



紅，艾枝應壓  
愁鬟亂。午夢  
千山，窗陰一  
箭，香奩新褪  
紅絲腕。隔江  
人在雨聲中，

晚風菰葉生秋  
怨。

瑞鶴仙（吳文  
英）晴絲牽緒  
亂，對滄江斜  
日，花飛人遠。

垂楊暗吳苑，

正旗亭煙冷，  
河橋風暖。蘭  
情蕙盼，惹相  
思、春根酒畔。

又爭知、吟骨  
縈消，漸把舊  
衫重翦。淒斷

流紅千浪，缺  
月孤樓，總難  
留燕。歌塵凝  
扇，待憑信，  
拚分鈿。試挑  
燈欲寫，還依  
不忍，箋幅偷

和淚卷。寄殘

雲剩雨蓬萊，

也應夢見。

鷓鴣天（吳文

英）（化度寺

作）

池上紅衣伴倚  
闌，棲鴉常帶  
夕陽還。殷雲  
度雨疏桐落，  
明月生涼寶扇  
閑。鄉夢窄，  
水天寬，小窗

愁黛淡秋山。

吳鴻好爲傳歸

信，楊柳閭門

屋數間。

夜遊宮（吳文

英）人去西樓

雁杳，敘別夢，

揚州一覺。雲  
淡星疏楚山曉，  
聽啼鳥，立河  
橋，話未了。  
雨外蛩聲早，  
細織就霜絲多  
少？說與蕭娘



未知道，向長  
安，對秋燈，  
幾人老？

賀新郎（吳文  
英）（陪履齋  
先生滄浪看  
梅）

喬木生雲氣，  
訪中興、英雄  
陳跡，暗追前  
事。戰艦東風  
煙借便，夢斷  
神州故里。旋  
小築、吳宮闋

地，華表月明  
歸夜鶴，嘆當  
時、花竹今如  
此，枝上露，  
濺清淚。 遨頭  
小簇行春隊，  
步蒼苔、尋幽

別墅，問梅開  
未？重唱梅邊  
新度曲，催發  
寒梢凍蕊。此  
心與東君同意，  
後不如今今非  
昔，兩無言相

對滄浪水。懷  
此恨，寄殘醉。

唐多令（吳文  
英） 何處合成  
愁？離人心上  
秋，縱芭蕉、  
不雨也飕飕。

都道晚涼天氣  
好，有明月、  
怕登樓。年事  
夢中休，花空  
煙水流，燕辭  
歸、客尚淹留。

垂柳不繫裙帶

住，漫長是、  
繫行舟。

湘春夜月（黃  
孝邁） 近清明，  
翠禽枝上消魂。

可惜一片清歌，  
都付與黃昏。

欲共柳花低訴，  
怕柳花輕薄，  
不解傷春。念  
楚鄉旅宿，柔  
情別緒，誰與  
溫存？空樽夜  
泣，青山不語，



殘月當門。翠  
玉樓前，惟是  
有、一陂湘水，  
搖蕩湘雲。天  
長夢短，問甚  
時、重見桃根？  
者次第、算人

間沒箇並刀，  
翦斷心上愁痕。

大有（潘希  
白）（九日）

戲馬臺前，採  
花籬下，問歲  
華、還是重九。

恰歸來、南山  
翠色依舊。簾  
櫳昨夜聽風雨，  
都不似登臨時  
候。一片宋玉  
情懷，十分衛  
郎清瘦。紅萸

佩，空對酒。

砧杵動微寒，

暗欺羅袖。秋

已無多，早是

敗荷衰柳。強

整帽檐欹側，

曾經向天涯搔

首。 幾回憶、  
故國萼蘊，霜  
前雁後。

青玉案（黃公  
紹） 年年社日  
停針線，怎忍  
見、雙飛燕？

今日江城春已  
半，一身猶在，  
亂山深處，寂  
寞溪橋畔。春  
衫著破誰針線？

點點行行淚痕  
滿。落日解鞍

芳草岸，花無人戴，  
酒無人勸，醉也無人管。

摸魚兒（朱嗣發）  
對西風、鬢搖煙碧，參

差前事流水。  
紫絲羅帶鴛鴦  
結，的的鏡盟  
釵誓。渾不記、  
漫手織回文，  
幾度欲心碎。  
安花著葉，奈



雨覆雲，情  
寬分窄，石上  
玉簪脆。朱樓  
外，愁壓空雲  
欲墜，月痕猶  
照無寐。陰晴  
也只隨天意，

枉了玉消香碎。

君且醉，君不  
見長門青草春  
風淚。一時左  
計，悔不早荆  
釵，暮天修竹，  
頭白倚寒翠。

蘭陵王（劉辰  
翁）（丙子送  
春）

送春去，春去  
人間無路。鞦韆  
外、芳草連  
天，誰遣風沙

暗南浦。依依  
甚意緒？漫憶  
海門飛絮。亂  
鴉過、斗轉城  
荒，不見來時  
試燈處。春去  
誰最苦？但箭

雁沉邊，梁燕  
無主，杜鵑聲  
裏長門暮。想  
玉樹凋土，淚  
盤如露。咸陽  
送客屢回顧，  
斜日未能度。

春去尚來否？

正江令恨別，

庾信愁賦，蘇

堤盡日風和雨。

嘆神遊故國，

花記前度。人

生流落，顧孺  
子，共夜語。

寶鼎現（劉辰

翁）紅妝春騎，

踏月影竿旗穿

市。望不盡、

樓臺歌舞，習

習香塵蓮步底。

簫聲斷、約彩

鸞歸去，未怕

金吾呵醉。甚

輦路、喧闐且

止，聽得念奴

歌起。父老猶



記宣和事，抱  
銅仙、清淚如  
水。還轉盼、  
沙河多麗。澠  
漾明光連邸第，  
簾影凍、散紅  
光成綺。月浸

葡萄十里，看  
往來、神仙才  
子，肯把菱花  
撲碎。腸斷竹  
馬兒童，空見  
說、三千樂指。

等多時春不歸

來，到春時欲  
睡。又說向燈  
前擁髻，暗滴  
鮫珠墜。便當  
日親見《霓  
裳》，天上人  
間夢裏。

永遇樂（劉辰  
翁）（小序  
略）

璧月初晴，黛  
雲遠淡，春事  
誰主？禁苑嬌  
寒，湖堤倦暖，

前度遽如許。

香塵暗陌，華

燈明晝，長是

懶攜手去。誰

知道斷煙禁夜，

滿城似愁風雨。

宣和舊日，臨

安南渡，芳景  
猶自如故。緜  
帙離離，風鬟  
三五，能賦詞  
最苦。江南無  
路，廬州今夜，  
此苦又誰知否？

空相對殘缸無  
寐，滿村社鼓。  
摸魚兒（劉辰  
翁）（酒邊留  
同年徐雲屋）  
怎知他、春歸  
何處？相逢且

盡樽酒。少年  
裊裊天涯恨，  
長結西湖煙柳。

休回首，但細  
雨斷橋，憔悴  
人歸後。東風  
似舊，向前度



桃花，劉郎能  
記，花復認郎  
否？君且住，  
草草留君翦韭，  
前宵正恁時候。

深杯欲共歌聲  
滑，濕春衫

半袖。空眉皺，  
看白髮樽前，  
已似人人有。  
臨分把手，嘆  
一笑論文，清  
狂顧曲，此會  
幾時又？

高陽臺（周  
密）（送陳君  
衡被召）

照野旌旗，朝  
天車馬，平沙  
萬里天低。寶  
帶金章，樽前

茸帽風欺。秦  
關汴水經行地，  
想登臨都付新  
詩。縱英游、  
疊鼓清笳，駿  
馬名姬。酒酣  
應對燕山雪，

正冰河月凍，  
曉隴雲飛。投  
老殘年，江南  
誰念方回？東  
風漸綠西湖岸，  
雁已還人未南  
歸。最關情、

折盡梅花，難  
寄相思。

璚華（周密）

朱鈿寶玦，天

上飛瓊，比人

間春別。江南

江北，曾未見、

漫擬梨雲梅雪。

淮山春晚，問  
誰識、芳心高  
潔？ 消幾番、  
花落花開，老  
了玉關豪傑。  
金壺翦送瓊枝，

看一騎紅塵，  
香度瑤闕。韶  
華正好，應自  
喜、初亂長安  
蜂蝶。杜郎老  
矣，想舊事花  
須能說。記少



年一夢揚州，  
二十四橋明月。

玉京秋（周  
密）（長安獨  
客，又見西風，  
素月、丹楓，  
悽然其爲秋也，

因調夾鐘羽一  
解。）

煙水闊，高林  
弄殘照，晚蜩  
淒切。碧砧度  
韻，銀床飄葉。  
衣濕桐陰露冷，

采涼花時賦秋  
雪。嘆輕別，  
一襟幽事，砌  
蟲能說。客思  
吟商還怯，怨  
歌長、瓊壺暗  
缺。翠扇恩疏，

紅衣香褪，  
成消歇。玉骨  
西風，恨最恨、  
閑却新涼時節。  
楚簫咽，誰寄  
西樓淡月。

曲遊春（周  
密）（小序  
略）

禁苑東風外，  
揚暖絲情絮，  
春思如織。燕  
約鶯期，惱芳

情偏在，翠深  
紅隙。漠漠香  
塵隔。沸十里、  
亂絲叢笛。看  
畫船盡入西泠，  
闌却半湖春色。

柳陌，新煙凝

碧，映簾底宮  
眉，堤上游勒。

輕暝籠寒，怕  
梨雲夢冷，杏  
香愁冪。歌管  
酬寒食，奈蝶  
怨良宵岑寂。

正滿湖碎月搖  
花，怎生去得？

花犯（周密）

（水仙花）

楚江湄，湘娥

再見，無言灑

清淚，淡然春



意。空獨倚東  
風，芳思誰寄？

凌波路冷秋無  
際。香雲隨步  
起，漫記得、  
漢宮仙掌，亭  
亭明月底。冰

絲寫怨更多情，  
騷人恨，枉賦  
芳蘭幽芷。春  
思遠，誰嘆賞  
國香風味？相  
將共、歲寒伴  
侶，小窗靜、

沉煙熏翠被。

幽夢覺、涓涓

清露，一枝燈

影裏。

瑞鶴仙（蔣

捷）（鄉城見

月）

紺煙迷雁跡，  
漸碎鼓零鐘，  
街喧初息。風  
檠背寒壁，放  
冰蟾，飛到蛛  
絲簾隙。瓊瑰  
暗泣，念鄉關、

霜華似織。漫  
將身化鶴歸來，  
忘却舊游端的。

歡極蓬壺藥浸，  
花院梨溶，醉  
連春夕。柯雲  
罷弈，櫻桃在，

夢難覓。勸清  
光、乍可幽窗  
相照，休照紅  
樓夜笛。怕人  
間換譜《伊》  
《涼》，素娥  
未識。

賀新郎（蔣  
捷） 夢冷黃金  
屋，嘆秦箏斜  
鴻陣裏，素弦  
塵撲。化作嬌  
鶯飛歸去，猶  
認紗窗舊綠。

正過雨、荊桃  
如菽。此恨難  
平君知否？似  
瓊臺、湧起彈  
棋局。消瘦影，  
嫌明燭。鴛樓  
碎瀉東西玉，



問芳蹤、何時  
再展？翠釵難  
卜。待把宮眉  
橫雲樣，描上  
生綃畫幅。怕  
不是新來妝束。

彩扇紅牙今都

在，恨無人、  
解聽開元曲。  
空掩袖，倚寒  
竹。

女冠子（蔣  
捷）（元夕）

蕙花香也，雪  
晴池館如畫。  
春風飛到，寶  
釵樓上，一片  
笙簫，琉璃光  
射。而今燈漫  
掛，不是暗塵

明月，那時元  
夜。況年來、  
心懶意怯，羞  
與蛾兒爭耍。  
江城人悄初更  
打。問繁華誰  
解，再向天公

借？剔殘紅燄，  
但夢裏隱隱，  
鈿車羅帕。吳  
箋銀粉研。待  
把舊家風景，  
寫成閑話。笑  
綠鬟鄰女，倚

窗猶唱，夕陽  
西下。

高陽臺（張  
炎）（西湖春  
感）

接葉巢鶯，平  
波卷絮，斷橋

斜日歸船。能  
幾番游？看花  
又是明年。東  
風且伴薔薇住，  
到薔薇、春已  
堪憐。更淒然，  
萬綠西泠，一

抹荒煙。當年

燕子知何處？

但苔深韋曲，

草暗斜川。見

說新愁，如今

也到鷗邊。無

心再續笙歌夢，



掩重門、淺醉  
閑眠。莫開簾，  
怕見飛花，怕  
聽啼鴂。

渡江雲（張  
炎）（久客山  
陰，王菊存問

予近作，書以  
寄之。）

山空天入海，  
倚樓望極，風  
急暮潮初。一  
簾鳩外雨，幾  
處閑田，隔水

動春鋤。新煙  
禁柳，想如今、  
綠到西湖。猶  
記得、當年深  
隱，門掩兩三  
株。愁余，荒  
洲古溆，斷梗

疏萍，更漂流  
何處？空自覺  
圍羞帶減，影  
怯煙孤。長疑  
即見桃花面，  
甚近來 致無

書。書縱遠，  
如何夢也都無。

八聲甘州（張  
炎）（小序  
略）

記玉關、踏雪  
事清游，寒氣

脆貂裘。 傍枯  
林古道，長河  
飲馬，此意悠  
悠。 短夢依然  
江表，老淚灑  
西州。 一字無  
題處，落葉都

愁。載取白雲  
歸去，問誰留  
楚佩，弄影中  
洲？折蘆花贈  
遠，零落一身  
秋。向尋常、  
野橋流水，待

招來、不是舊  
沙鷗。空懷感，  
有斜陽處，却  
怕登樓。

解連環（張  
炎）（孤雁）



楚江空晚，悵  
離群萬里，恍  
然驚散。自顧  
影、欲下寒塘，  
正沙淨草枯，  
水平天遠。寫  
不成書，只寄

得相思一點。

料因循誤了，

殘氈擁雪，故

人心眼。誰憐

旅愁荏苒，漫

長門夜悄，錦

箏彈怨。想伴

侶、猶宿蘆花，  
也曾念春前，  
去程應轉。暮  
雨相呼，怕驀  
地、玉闌重見。  
未羞他、雙燕

歸來，畫簾半  
卷。

疏影（張炎）  
（詠荷葉）

碧圓自潔，向  
淺洲遠浦，亭  
亭清絕。猶有

遺簪，不展秋  
心，能卷幾多  
炎熱？ 鴛鴦密  
語同傾蓋，且  
莫與、浣紗人  
說。 怨歌忽  
斷花風，碎却

翠雲千疊。回  
首當年漢舞，  
怕飛去漫皴，  
留仙裙摺。戀  
戀青衫，猶染  
枯香，還嘆鬢  
絲飄雪。盤心

清露如鉛水，  
又一夜西風吹  
折。喜淨看、  
匹練飛光，倒  
瀉半湖明月。

月下笛（張  
炎）（小序  
略）

萬里孤雲，清  
游漸遠，故人  
何處？寒窗夢  
裏，猶記經行



舊時路。連昌  
約略無多柳，  
第一是難聽夜  
雨。漫驚回淒  
悄，相看燭影，  
擁衾無語。張  
緒歸何暮？半

零落依依，斷  
橋鷗鷺。天涯  
倦旅，此時心  
事良苦。只愁  
重灑西州淚，  
問杜曲人家在  
否？ 恐翠袖天

寒，猶倚梅花  
那樹。

天香（王沂  
孫）（龍涎  
香）

孤嶠蟠煙，層  
濤蛻月，驪宮

夜采鉛水。汛  
遠搓風，夢深  
薇露，化作斷  
魂心字。紅磁  
候火，還乍識、  
冰環玉指。一  
縷縈簾翠影，

依稀海天雲氣。

幾回帶嬌半醉，

翦春燈、夜寒

花碎。更好故

溪飛雪，小窗

深閉。荀令如

今頓老，總忘

却樽前舊風味。

漫惜餘薰，空  
篝素被。

眉嫵（王沂  
孫）（新月）

漸新痕懸柳，  
淡彩穿花，依

約破初暝。便有團圓意，深深拜，相逢誰在香徑？畫眉未穩，料素娥、猶帶離恨。最堪愛、一曲銀

鉤小，寶奩掛  
秋冷。千古盈  
虧休問，嘆慢  
磨玉斧，難補  
金鏡。太液池  
猶在，淒涼處、  
何人重賦清景？



故山夜永，試  
待他窺戶端正。

看雲外山河，  
還老桂花舊影。

齊天樂（王沂  
孫）（蟬）

一襟餘恨宮魂  
斷，年年翠陰  
庭樹。乍咽涼  
柯，還移暗葉，  
重把離愁深訴。

西窗過雨。

怪瑤佩流空，

玉箏調柱。鏡

暗妝殘，爲誰

嬌鬢尚如許？

銅仙鉛淚似洗，

嘆移盤去遠，

難貯零露。病

驚秋，枯形

閱世，消得斜  
陽幾度？餘音  
更苦，甚獨抱  
清商，頓成淒  
楚。漫想薰風，  
柳絲千萬縷。

長亭怨慢（王  
沂孫）（重過  
中庵故園）

泛孤艇東皋過  
遍，尚記當日，  
綠陰門掩。屐  
齒莓苔，酒痕

羅袖事何限？  
欲尋前跡，空  
惆悵成秋苑。  
自約賞花人，  
別後總、風流  
雲散。水遠，  
怎知流水外，

却是亂山尤遠。

天涯夢短，想  
忘了綺疏雕檻。

望不盡冉冉斜  
陽，撫喬木年  
華將晚。但數

點紅英，猶識  
西園淒婉。

高陽臺（王沂  
孫）（和周草  
窗寄越中諸友  
韻）



殘雪庭陰，輕  
寒簾影，霏霏  
玉管春葭。小  
帖金泥，不知  
春是誰家？相  
思一夜窗前夢，  
奈箇人、水隔

天遮。但淒然、  
滿樹幽香，滿  
地橫斜。江南  
自是離愁苦，  
況游驄古道，  
歸雁平沙。怎  
得銀箋，殷勤

說與年華。如  
今處處生芳草，  
縱憑高不見天  
涯。更消他，  
幾度東風，幾  
度飛花。

法曲獻仙音

（王沂孫）

（聚景亭梅次  
草窗韻）

層綠峨峨，纖

瓊皎皎，倒壓

波痕清淺。過

眼年華，動人  
幽意，相逢幾  
番春換。記喚  
酒尋芳處，盈  
盈褪妝晚。已  
消黯，況淒涼  
近來離思，應

忘却明月，夜  
深歸輦。萋萋  
一枝春，恨東  
風人似天遠。  
縱有殘花，灑  
征衣、鉛淚都  
滿。但殷勤折

取，自遣一襟

幽怨。

疏影（彭元

逊）（尋梅不

見）

江空不渡，恨

蘼蕪杜若，零

落無數。遠道  
荒寒，婉婉流  
年，望望美人  
遲暮。風煙雨  
雪陰晴晚，更  
何須春風千樹。  
盡孤城、落木



蕭蕭，日夜江  
聲流去。日晏  
山深聞笛，恐  
他年流落，與  
子同賦。事闊  
心違，交淡媒  
勞，蔓草沾衣

多露。汀洲窈  
窕余醒寐，遺  
佩環、浮沈澧  
浦。有白鷗、  
淡月微波，寄  
語逍遙容與。

六丑（彭元  
遜）（楊花）

似東風老大，  
那復有當時風  
氣。有情不收，  
江山身是寄，  
浩蕩何世？但

憶臨官道，暫  
來不住，便出  
門千里。痴心  
指望回風墜，  
扇底相逢，釵  
頭微綴。他家  
萬條千縷，解

遮亭障驛，不  
隔江水。瓜洲  
曾幾，等行人  
歲歲，日下長  
秋，城烏夜起。

帳廬好在春睡，  
共飛歸湖上，

草青無地。 懣  
懣雨、春心如  
膩，欲待化、  
豐樂樓前帳飲，  
青門都廢。 何  
人念、流落無  
幾，點點搏作

雪綿松潤，爲  
君裛淚。

紫萸香慢（姚  
雲文） 近重陽、  
偏多風雨，絕  
憐此日暄明。  
問秋香濃未，

待攜客、出西  
城。正自羈懷  
多感，怕荒臺  
高處，更不勝  
情。向樽前又  
憶、灑酒插花  
人，只座上已



無老兵。淒清，  
淺醉還醒，愁  
不肯、與詩平。

記長楸走馬，  
雕弓射柳，前  
事休評。紫萸  
一枝傳賜，夢

誰到、漢家陵。

盡烏紗便隨風  
去，要天知道，  
華髮如此星星，  
歌罷涕零。

金明池（僧  
揮） 天闊雲高，

溪橫水遠，晚

日寒生輕暈。

閑階靜、楊花

漸少，朱門掩、

鶯聲猶嫩。悔

匆匆、過却清

明，旋占得、

餘芳已成幽恨。

却幾日陰沈，

連宵慵困，起

來韶華都盡。

怨入雙眉闌鬥

損，乍品得情

懷，看承全近。

深深態、無非  
自許，厭厭意、  
終羞人問。爭  
知道、夢裏蓬  
萊，待忘了餘  
香，時傳音信。

縱留得鶯花，

東風不住，也  
則眼前愁悶。

鳳凰臺上憶吹  
簫（李清照）

香冷金猊，被  
紅浪，起來

慵自梳頭。任

寶奩塵滿，日  
上簾鉤。生怕  
離懷別苦，多  
少事、欲說還  
休。新來瘦，  
非干病酒，不  
是悲秋。休休，

者回去也，千  
萬遍《陽關》，  
也則難留。念  
武陵人遠，煙  
鎖秦樓。惟有  
樓前流水，應  
念我、終日凝



眸。凝眸處，  
從今又添，一  
段新愁。

醉花陰（李清  
照） 薄霧濃雲  
愁永晝，瑞腦  
消金獸。佳節

又重陽，玉枕  
紗廚，半夜涼  
初透。東籬把  
酒黃昏後，有  
暗香盈袖。莫  
道不消魂？簾

卷西風，人比  
黃花瘦。

聲聲慢（李清  
照） 尋尋覓覓，  
冷冷清清，悽  
悽慘慘戚戚。  
乍暖還寒時候，

最難將息。三  
杯兩盞淡酒，  
怎敵他、晚來  
風急？雁過也，  
正傷心，却是  
舊時相識。滿  
地黃花堆積。

憔悴損，如今  
有誰堪摘？守  
着窗兒，獨自  
怎生得黑？梧  
桐更兼細雨，  
到黃昏、點點  
滴滴。這次第，

怎一個愁字了  
得！

念奴嬌（李清  
照） 蕭條庭院，  
有斜風細雨，  
重門須閉。 寵  
柳嬌花寒食近，

種種惱人天氣。

陰韻詩成，扶  
頭酒醒，別是  
閑滋味。征鴻  
過盡，萬千心  
事難寄。樓上  
幾日春寒，簾

垂四面，玉闌  
干慵倚。被冷  
香消新夢覺，  
不許愁人不起。

清露晨流，新  
桐初引，多少  
遊春意。日高



煙斂，更看今  
日晴未。

永遇樂（李清  
照） 落日熔金，  
暮雲合璧，人  
在何處？ 染柳  
煙濃，吹梅笛

怨，春意知幾  
許？元宵佳節，  
融和天氣，次  
第豈無風雨。  
來相召、香車  
寶馬，謝他酒  
朋詩侶。中州

盛日，闔門多  
暇，記得偏重  
三五。鋪翠冠  
兒，撚金雪柳，  
簇帶爭濟楚。  
如今憔悴，風  
鬟霜鬢，怕見

夜間出去。不  
如向簾兒底下，  
聽人笑語。